




Bodo and Dimasa Heritage Digital Archive



Title of the book : **Khurang**
Editor: **Biswajyoti Barman**

Photographed by: **Sumaiya Ferdusi**
Location: **Assam University**



KHURANG

Dimasa Sahitya Sabha Laihjab

Khaikhogagni

February, 2014



DIMASA SAHITYA SABHA
Dangjohmsgao, Haflong :788819
Dima Hasao, Asom

Rehpsaikhusgao
BISWAJYOTI BARMAN

KHURANG

Dimasa Sahitya Sabha Laihjab
Khaikhogagni
February, 2014



Dimasa Sahitya Sabha
Dangjohmsgao, Haflong :788819
Dima Hasao, Asom

Rehpsaikhusgao
Biswajyoti Barman

KHURANG, A DIMASA SAHITYA SABHA JOURNAL,
*Edited by - Biswajyoti Barman & Published by - Gopal
Bhargov Thaosen, Gen. Secretary Dimasa Sahitya Sabha,
Hq. Haflong, Dima Hasao
Vol. - II, February, 2014*

.....

Khaikhoya :
**Gopal Bhargov Thaosen, Gen. Secretary Dimasa Sahitya
Sabha,**
Hq. Haflong-788819, Dima Hasao.

Courtesy :
**Education Department
Govt. of Assam**

Cover Page Deisgned :
Jugal Bora

Jurusandi Besehng :
Rj. Rajasi Thodan

Price : Rs. 150/-

Printed at :
**Bhabani Offset Private Limited
Bhabani Complex, Hatishila, Panikhaiti
Guwahati-781 026**



Khurang
Dimasa Sahitya Sabha
Laihjab Dihongagni
Rehp-saikhuyahraoni Johm
2013-14

Biswajyoti Barman
Vijoyanada Khimprai
Uttam Bathari
Jonmejy Longmailai
Minist Jigdung
Amlandev Barman (Phamiebar)

RENLAIH

- * Reph-saikhuhsaoni grao 5
* Danghojsgao Habah suryabani yaoblai 7

Rehpjuh

- * Bothor jahng Dophahi
Dimasaraoni Dangthai odeh Rajabthai
: **Ramendra Langthasa** 13
- * Dimasa Khuh'rgai Sahitya : Naiphla Naigasih
: **Biswajyoti Barman** 21
- * Dimasaraoni Grao-Khandi (Grao-shol)
: **Dr. Sudipta Khersa** 35
- * Dimasani Dara-Disa-Daramah...
: **Najen Nunisa** 42
- * Rjabdambai
: **Phani Bhusan Haflongbar** 50
- * Grao-dimani Tone
: **Deepak Barman** 60

Kharminsah :

- * Bithilim
: **Hiralal Thaosen** 64
- * Bonju odehe Mander
: **Bonashree Barman** 68

Thairili

- * Paritosh Barman-ni Thairili
: **Habsaohah Hajaihih** 72
- * Makhanlal Haflongbar-ni Thairili
: **Thangba Lamahah** 73
- * Jonmejoy Longmailaini Thairili
: **Oh Amai** 75
- * Bonashree Barman-ni Thairili
: **Dainjiginini Bumu** 76
- * Rabindranatha Tagore-ni Thairili
: **Bharat Thirtha** 77
- * Jatiram Bodosan-ni Thairili
: **Yader** 80

Rehpsaikhusgaoni Grao

'Khurang' Dimasa Sahitya Sabhani khurang mamahng sining niya, eboh Dima-jadini khurangbomuh. Grao-dimani hayamhah eboh Khurang mah-graoni graokhe thineh johneh'ning sangsaijaoba maithai jahng 2011 maithihah. Khurang– thaijenba sainkhalihah, boni mah-graoni kharimin-jarimin khe, boni dukhu-waimukhe, boni khaja-minini graokhe, boni laihrimin thangraiminni graokhe thiren thilabamuh; mahgraoni saohkhulini graokhe joren jolabamuh odeh thaijenba sainkhalihah bai'thibalining thilabamu– maithaisihah phinsih mamahngde 'Khurang' thaiphaima thihih. Boh saomin babuhi phainang, khajamahbo-dukhumahbo labuphanang baolabamuh. Thikhabo lamelah jalangkha, maithaigni yahonhahseh 'Khurang' thaiphinphaidu. Boni saohgari-mahngaribo sgangthaneh khasedaohi, ramdaohisehkho. Grao-dima mahgrao jahng thaigne rehpgneh gri thikhala 'Khurang' brah nising bthai maima, khurang maima ?! 'Khusongde dibaikhe daokhure, subungde jibaikhe' thiyaba graolai jibaini yahon ruhi Dimsaraoni sain laihbalai jadu. Bonsih mahgraoni graokhe baosramya, thaisramya, rehpsramya. Odehjahng 'Khurang' thaiphinphaiba lamela jaba.

Thikhabo dinihah jing baogejeb baohi thiphinbodu– duh nisingde nisi ni jurumah maikhade khasehseh thikhabo maithaisihah phinsih mamahngde 'Khurang' thiaiphaima. Magrao bumani graokhe baohi khaisa srangba bubli khaikhohi rehplaiha. Khurang'ni

jaba jaya ni graokhebo rehphi thaihi haiha. Jing Khurang'ni buphinhah boh buthukhe thatikhuhi dengnang.

Duhani baigo gagnihah 'Khurang'khe jini khuhrgai sahityani bubar, blai, budung jahng slamkhuma baobamuh. Thikhabo rehpuh maismayabani gebreng-gthapning slamkhuma nangkha. Grao-dimajahng rehpsongyarao gribani asaba 'theme' masihah 'Khurang' laihjab dihonmabo gbangning dubi. Odebani rajkanti (political) graokhe garhi Dimajadineh phantha dophayaba asaba graohabo rehpuh rehplailaphure. Kharmin, thairili, rjabthai magni magtham khlahing haihakhabo jing saikhuhi sugunang. Rehplai- rehpbaisi slamkhulai, phorilai- phoribaisi slamkhulai, mah-grao grao-dimakhe mathangkhulai.

Juthai

Biswajyoti Barman
Rehpsaikhuhsao

Danghojasgao Habah suryabani yaoblai

Dimasa Sahitya Sabha'ni man-ganang melhoja gedemah, melhoja pharai, givin-givin jilajomni melhoja, danghoja odeh haphai-haphaiha dongyaba johmbra buthuni melhoja, danghoja odeh rajirao, mamahrao, daphuyungthurao, bihandaorao.

Sangangthao ahni hamjaomah khasaomahkhe nisih khribne yaophalahadu.

Rajirao, dinini ibu srungba bubari basainha, majangba Khondoh February bdaingha 'Dimasa Sahitya Sabha' maithaijang maithai-jrahha gasenkha. Dinini basainha 'Hayung khrahsnih hakhonkhe rimih-rimih wainsudu. dambra gahi thangyaba 'JL Thaosen, Proten Thaosen, Kumud Candra Bodosa, Nirupoma Hagjer, hayung khrahsnihni Konok Bodosa, Birili khuranggnang Bhodra Sorongphang'khe hamsinuh waisodu. Bonsihkhe balaophuya. Dinini basainha bonsikhe ang ilang-ilang khlimladu.

Dimasa Sahitya Sabha'bo duhala nagasa japhaikha, mathalasa japhaikha, Sisongsa dihi phadaing yaosiphuphaikha. Jakhaisa dihi nathusa rimpuphaikha. Mlaini muhhabo galaiphaikha. Bumayaba, buphayaba saodinriba mlaini muha lajimani grao japhaikha.

'Dimasa Sahitya Sabha'ni darahjang danghojasgao bubaingni habah surba dinijang maithaignih soblaikha, Jorai hisapjang ahng

danghojasgao bubaing ajaoba daglajiang maithaidoh sokha, Ibu maithaidohjang khebgniba habah surlangbaha bilai sosi 'Dimasa Sahitya Sabha'khe hamdaoriphukha, jnahdaoriphukha bukhela khahrihi dongyarao, muhrihi dongyaraose thiphlasophuma. Ibuha rajiraokhe odeh ahni danglugu thuraokhe phinhi khainsu phinlama baodu, isaba khusi hambanise jalathing, gajaithaolangbanise jalathing saojang, musi khusikhebo yaoblai phunuhphuya, balaimanibo niya khiribni jurumah jangse habahbo soriphuba, yaoblaibo maiphuba. Joraini grao phaiya.Thikhabo ahngbo baoba mailadu, Dimasa Sahitya Sabha' hajaijen ribaha ringyayaba, thayayaba hojaijik thikhabo sa'khede mathanghining hajairikha thibalai, ringya, grikyah thikhabo 'Dimasa Sahitya Sabha' hajairibaha ahngbo yaojerphabubase.

Dimasa Sahitya Sabha' baigoba mahoni graodimakhe mulukni sgangna hamdaorihni jnadaorihni basaomairima, malaijang lailolo mahoni graojang sainglaiphuma, mithijaoma olaibaohi,

Thikhabo ibu baothai buthukhe gibi-muthangjang numaimaniha jing hamsining duruhi dongkho. Jini habah surbaha lengbaha lenggoma, songlaima,Khammaniha, khamlaima, yaoblai buthukhe thathikhuma odehbasi khusini bantha duha hamsining nangdaothaoyaba jakha nohyam. Dimasa Sahitya Sabha'ni jarni thihi dinisosi nohyam, hahyam girikho, Ibu graoni khilaihi baodada hayam nangjaohi 'Dima Hasao Jila Autonomous Council' ni duhani CEM, gedemah mungmajang Debojit Thaosen niha khainsumahlai yaophakha. 'Dima Hasao Jila Autonomous Council ni Settlement Officer nising hayam maimani musi blam nuphuyakho.

Mahoni graodimakhe hamjaoyahrao, rajirao. graodimakhe hamdao rima, jnadaorima, mulukniha mithijaorima. Ibu habahning 'Dimasa Sahitya Sabha'ni yaderma. Ahng danghojasgao bubaing ajaobanising ibu habahkhe hamsining khah ribase, Buni khilaihi

Phorijenkhotha laisi hodaiphugothai '**Dimasa Tex-Book Evolution Sub-Committee**' ni hojaraokhe laisi reb-khakhumani melha sainglairiba. Ibu 'Dimasa Tex-Book Evolution Sub-Committee' ni hojaraobo duhasosi 'Dimasa Primer: Ahni grao-i, Ahni grao-ii laisi khaikho hi phorikhoha hodaikha. Olaining phorijenbanising mahoni graokhe phorima maigothai laisi khaikhomani thilaihi ibu laisikhebo repblai kha. Phaiginyaba maithainiphrang class-v habo graodimakhe Dima-hasao jilaha hadairimani thik jahi dong odede ibu laisi buthukhe khirib jila buthuhabo soriphugothai sapaihi khaikhomani Assam sorkarni '**Director Elementary Education Government of Assam**' niha khainsuhikha. Ibuni khalaihi jilajom, jombra buthunising dimasa nolaibuthuha phorijenkho dongyaba odede dimasa phoriansani saolekha rikhihi dangjomsgaoni danghojasgao khe khanahrimani graobonoh mathaoba, buhkhe jilajombuthu khahrihi ibu habaha jungkhe juruhba thikhahi singganing habah gakhuriphunang baohi asahladu.

Dimasa graojang repyahrao, khiribbo jar-jarni repthaijang repbaha graodimani graothai baosi jayabani phoribaha dibinbakhe, khiribbo baosi khalaihi replaimani odede graothai renmani khalaihi 'Dimasa Sahitya Sabha' nising dimasa repyahraokhe jamahi/08/2013 nising sainggni basaing lahai 'Diphu Dimasa Club' ha Dimasa graomin repthai odede graorenthai (Seminar cum workshop on the spelling and glossary of Dimasa language) ni basaotha khosibosong odede melkhisai khamriba. Olaining Hawar haphaihabo baosi khusi habah jehi khusibosong odede melkhisai khamrimani basaing thik khalaibamu. Buha orahni jila johmni danghoja khusikhe khah riyabani darahjang buh habah surphuya thaolakha. Olaining Dimasani Jarimin'ni basaothabo Nagaon jila johmni jurumahjang Komorakata nohlaiha noh-miphraisang danghi lailangyaba 05/01/2014 khali Dimasani jariminni basoha ringyahraokhe jamahi melkhisai khamba.

Odeh Dimasa Sahitya Sabha'nising daingdoh jang khebsi 'Khurang' laijab (**Journal**) khaikhomanibo jini habahhaning jenjenba odeh repkhakhumanibo duhani bubaing yaophajaoyahrao, gedemah mungmajang Biswajyoti Barmanne Rephojani bubaing yaophahi repjhom (Editorial Board) songlaiba. Ibu 'khurang' laijabni jen jenyabakhe khaikhobani yahonha khaikhomani khlahi 'Khurang laijab' khakhuyarao hamsining khahrihi repyahraokhe bihi repthaibuthu hodaimani khainsubamu. Thikhabo rebyabakhe maiphuyahi khaikhophuya thaoba, bukhe Ibu khamgasnih memani 'Rmaolajang baosi khurujenmani jahi dong..

Odeh gibin gibin laisi khaikhomanibo habah jendu. Sgangthao Dimasa jadini '**Dimasa Bir Kharimin gnanng Sambodhan Phonglo : Saingkhlip-Sainja Hathani Thangdaothao Smaokhuni Khongsi**' odehe buni baothai,yawaithai buthukhe bikhiri-bikhiri saikhuhi-gajaikhuhi repkhakhuba 'Dimasa Sahitya Sabha'ni melhoja pharai jahi dongyaba gedemah mungmajang Biswajyoti Barman(Daolagajao) rep khakhuyabakhe Dima-Hasao Autonomous Council'ni jurumahjang Dimasa Sahitya Sabah' khaikhokha. Olaining Dimasani basoha repyaba jarimin dg.**Joy Kumar Raijiyung** ni '**Dima Raji**'odeh dg.**Monicharon Barman** repyaba '**Hirimba Bhasa Probesh**' 'Bangla' graonising Dimasa graoha gedemah Biswajyoti Barman thaislaiyabakhe 'Dimasa Sahitya Sabha' nising khaikhomani graobonoh mathaoba. Buh graobonohni habaha 'Dima Raji' laisikhe khamgasnih melmani habaha khurujenhi rajiraoneh yaophama. Olaining Dimasa Sahitya Sabha'ni thangrai-hoja dongyaraoni Thangraimin' laijab khakhumanibo graobono mathaobamu, Buh khusibo Thangrai-hoja dongyarao jarni thangraiminkhe repi haiyabani habah gejer jahi dong. Ibu khusi jenkha odehbani yahonha thikhabo yahonni dangjomsgaokhe habahsorimani bihi ibu graokhe dinini melha khribne khainsuladu.

Dimasa ni 'Graodima Phandar' (Dictionary) repkhakhuyaba habaohbo danghi dong. Duha sosi khebbrih ABILAC'(Anandaram Borooh Institute of Language Art and Culture) ha khosibosong khamlaihi khusi ronphailaihi repkhakhulaidu. Ibu khusi maithaisini bisingha habah soriphunang. Ibu khusi Dimasa jadini bantha hamsining khajasisiyaba grao, ibuhaning puila Dimasanisang Dimasa, Dimasanisang Asimsa odeh Dimasanisang English graojang maiphusiyaba Dimasa ni 'Graodima Phandar' (Dictionary) baigojenma.

Olaining Dimasa repyahraokhe repbaha khaha bol mairimani, repma mijingrimani baolaidada 'Dimasa Sahitya Sabha'ni melhoja jajenyaba dg. J.LThaosenni bumungjang 'Lairidim yaosandi' (Jotindralal Thaosen Literary Award) yaophamani graobonoh mathaoba.Ibu yaosandiha rangjang rijingdan khilaihi yaophamani graobonoh dongba. Ibu habakhe duha sosi dg,Nirupoma Hagjer odehe dg, Kumud Chandra Bodosa'ne yaophakha. Olaining Dimasa Sahitya Sabha'ni khamgasnih melmah, Lumailam hakhon' ha mangnang mungmajang Uttam Chand Barman'ne melrajiha yaophamani salaihi dong, Ibuha rajiraokhe khanahrihi khajama khajaladu. nish khribbo mithidu, jinih Dimasa Sahitya Sabha'ni melhoja pharai grah gedemah mungmajang Uttam Chand Barmanne Asom Sorkar nising.Sahitya penson yaophakha.Ibu Dimasa Sahitya Sabha'ni namdari, odehbani hamsining jing khajahladu.Jinih khajahmakhe gedemah Uttam Barmanne khnahrihi Dimasa Sahitya Sabhani jahi Cachar jila johm hamjaohahsandi khaisuba, Ibu Dimasa jadini jariminha namdari jahi thaoma.

Mahoni graodimakhe hamjaoyarao rajirao, ahng alang alang nisikhe khainsuladu, Dimasa Sahitya Sabha'khe jadini mirimding, jadini derphanai khalaistaniha nisini jurumah hamsining nangdu, odehse habah surba ragaophuma, majangphuma. Duhasosi 'Dimasa

Sahitya Sabha' maithaijang maithai jibrih laikha. Odehjangbu jini jombrnising, jilajomnising sahityakhe hamjaoyaraoni sing 'Dimas Sahitya Sabha'ni thangrai-hoja (membership) lahayarao bangyakho. Odehbani membership habmani nisikhe bilahadu. Odehse 'Dimasa Sahitya Sabha'ni dangjomsgao, jilajom, jombrabuthuni hojarao bekaliba habah gajai himkhahi Dimasa Sahitya Sabha'khe mathanghi, hamrihi jadini mirimding raoriphuma.

Olaining hosomni khusi habah yawaihi thangbaha nisinising rangjang, rihjang jurumah maiyaba, rajinisang kharangphaing maiyahba odeh sorkarnising jurumah maiyabasi buthukhe ragaosisi yawaimaniha Bank Account ha thathibani yahonhase burangkhe khoros khalaiba. Yahonha melmah khamblaihi ibu rang, rihni saingrikhe 'Auditor Report' ha maitharnang,

Yahonthaoha rajirao, mamahrao, babahrao odeh 'Dimasa Sahitya Sabha' khe hamjaoyaraone ani hamjaomah khasaomakhke phinhi yaophalahadu. Odeh ahni graojukhe erahaning jamridu.

Juthai

'Hayu Laothing Ahni Mahoni Grao'

Nisini

Gopal Bhargov Thaosen

Danghojsgao

Dimasa Sahitya Sabha

Bothor jahng Dophahi

Dimasaraoni Dangthai odeh Rajabthai

-Ramendra Langthasa
Haflong

Sahitya (literature) thibaha rehphi phaihi dongyaba sining niya. Subung'ni khuh rgai jahi thaihi, yerhi, thanghi dongphalangyaba kharimin-badera, grahthai-rjabthai, graokhandi-graosol, graograh-graothai, graomin-jarimin buthubo sahityaning. Eboh buthu jakha khuni sahitya graode oral literature. Subung'ni somaj masini dangjithai-daogainthai, dukhu-waimuh, khaja-mini, nangjaothai-nagjaoyathai, saomin-baomin edebasikhe bosong bonoh slamhining khuni sahitya yerba thaibaseh. Bharatni Mongoloid hajikni jadi bojohmsa buthuhah Dimasaraoni olaiba khuni sahitya ba oral literature gbangning gnangseh. Dimasaraoni samajik dangjithai daogainthai phadain-hagong, hadi dangthaini basaoha yao jerhining yerba phaibase. Sainkhlip Cachar hajuh haphaihah somajni yawaithai buthubo phadain-hagong dangba jahng dophahining giding giding phaibaseh.

Elai gidinghi slaihi phaiyaba socio-cultural life Phadain dangyaba haphaiha maising bothorhah hagra yaobani blam jahng jendu. Sganhah naidahi dengyaba hagra haphaihah nagrarao, jalairao rowa, sihsong lahi hagra yaomane thangre. Hagra yaomane thangbani sgangha Hangso ba Surem Bisu jilaimane thilaihi dongkhade thip nohlai maisini naga-mathalarao phadain khaoyung danglaire, phaiginyaba maising bothorha Hangso-Suremni khlaihi rahng bojohm khlailaimaneh. Elaiba hagra yaothorhammathlarao rjabre –

Wahthiling hah yaoneh thangyarao

Thurisah bojorjahng labori.

Hamrim Godokhe yaoyarao

Rasiphong bojorjahng labori.

Nagarao hagra yaoma thangyarao jakhade jar'raokhe khaja
khurine edehe rjablaire –

Phai thangnang jalairao phai thangnang,

Jalairao dangsmai danghinang.

Jalaijahng dangsmai dangkhade,

Phagera dangbudi maireneh.

Jalaijahng dangsmai dangkhade,

Mahgera daohbudi maireneh.

Dimasa somajhah Nohdrang graode grao-asum jahng Deka
Chang thiyabani hathani odeh dang-habah debi, bangbi. Hamside
eboh Nohdrang nagaraoni dangthai dithaini thani-gejer khongsilaiseh.
Nagarao buthu sainbli odeh horhah Nohdranghah githimlaire. Orahah
bonsi phagrasao nising maihi phaiyaba mlaothai 'Rimin Nehlaiba'
(Bambo wrestling), 'Longthai Sugulaiba' (Stone/Weight lifting) odebasi
mlaothai mlaolaire. Damba- suba, baiba-luba odebasibo hadailaire.
Khram-Muri, Muriwathesah, Khramdobong odebdasi damlaire,
damslinglaire. Grao thaisi jahng Nohdrang khe Cultural Centere
masilai thijadu. Eboh Nohdrangni thijagothaiyaba aar graothai mongsi
jakhade – Nohdrang hah masainjikrao thangbakhe magnahi dengba
gejebbi. Odebani khlahining Nohdrang'ni haplamahah gedeh khlahi
bondo baosohi dengbaseh. Nohdrang bisinghah mussi badim
dimsoyaba gri odeh Nohdranghah nagarao mamahng sining thuphuba.
Nohdrang'ni nohkhir nalaini dongthani nohni nokhimthane judaore.
Erahah thubahah rjabiyaba rjabthaike Nohdrang Thubani rjabthai thire.
Eboh rjabthai sibringthai gnang –

Horsini hor phaiba niphrangde,

Thudada mudri lailangnang.

Hogjer hakhongmah gamathi,

Digejer dikhongmah lumathi,

Dikhongmah lumabo di giri,

Hakhongmah gamabo hah giri.

Gjangthor hah hagra yaoblaibani yahohah Phaogun (autumn) bdain sophaire. Eboh bothorkhe Dimasarao majangdaothao baodu. Eboh bothor daohrili rijingni bothor, mihriili rijing ni bothor. Graothai'hah dong 'Bonjuh Mander Jaolili, Daohmah Daohsah Daohrili'. Ebohni lugu barsra majang sibnangkho, bisih khimbar majang barnangkho. Dungbo dungyah, gjangbo gjanya. Odebani eboh bothor- bothor majang bothor-rani. Eboh bothorhah Dimasarao Phagrasaoh M dai khlimre, Mahgrasaoh M dai soware. Bohni bithai edehe –

Bothor hamdao Phaogun badainhah
Bonjuhbiliah Manderbiliah Mamdai Phamdai
Ningkhe jirikdu, ningkhe sowadu,
Ningning naisoma, ningning nusoma.

Eboh bothor majang Dimasaraoni jukhu bothorbo. Yawaihi phaiyaba dara maphi Dimasaraoni jukhulaithaini khusi jendu- meyah (daman, bridegroom) ni bumah, bupha, khraorao khoina (bride) ni nohhah thangjenba nising. Elai thangjenbahah daman ni bumah buphathu olai thangka hembani graokhe phlahire. Bohah thire-

Phanthao jowaikhala, phanthao gaisaire.
Morsai jowaikhala, morsai gaisaire.
Olaining bsah khrangkhala bsah phajire;
Bisik khrangkhala bisik phajire.
Odebani, haindoji rikhihi, thidoji rikhihi
ninihaning phaiba.

Elai daman'ni bumah bupha ba khraorao koinani noh'hah thangbakhe 'Bahamjik Sainba' thire. Elai sainbani yahonhah sainjaoyaba nokhorni masainjikni bumah, bupha ba hainrao-thirao, yaoda yaosi jajaolaihi jukhurimakhe jajaore thikhade sainya nokhor nising masainjikni nohkorhah 'Sandi' dangsingre. Kilogram seh damsi sehm- thailik baliah wahduh phinsni khahi bujuh juhuh langdada koinani nokhorha digardada grao mathaosolaliba khening 'Sandi Dangsingba' thibaseh. Ebohni yahon ni khusi jakhade 'Laothai Langba'; bohaning jukhumani basain-bohor khalaire, 'khalti' (reverse dowry) bisilai lama laya thisolaire. Eboni yahonhah basain bohor

sohi khoynani nohha jukhure. Eboni phantha gibin gibin khusisah-khusimah dongyaba buthu jakhade—*Gilim Gsah Naiba, Khalthi Riba, Khorong Ruba, Khamren Khamba, Daman Khlimba*. Eboh buthuhah *Khalthi Riba, Khamren Khamba, Daman Khlimba jakhade* jukhu-habah berenni thangdaothaoba khusi. Khalthi ribani ortho jakhade daman'ni gedehede nising khoynani bupha-bumaneh baigni gedeheni hainthirao odeh rajini khraorao dongphahi *reverse dowry* yaophathai. Yawaiphabuba dara maphide Dimasaraoni jukhuthai sainhaning jabaseh. Eboh jukhuthaini khribthane thangdaothao odeh naithaosisih majangsisih jayaba jakhade baigni gedeni radaoyarao hainrao thirao, khraoraokhe daman khlimyaba. Khoynani hakhli guwarhah elai khlimre. Daman phulili rih-jem gainhi, khroh sgaopha-phagri majang khahi, gor'nahah majangsisih Risah-rihmaih sihih, yaopha jabhi khraoraoni yaphakhlahah khroh gonglaihi khlimre. Elai khlimbahah khraorao basiyaba graothai buthu edehe —

Brai Sibarai Amang Gamadi

Ning basain ribani Ning bohor ribani

Nini darakhe rikhihi Nini phangsakhe rikhihi

Jini basakhe magin gailaidu phagin songlaidu

Jini basala danghi jibaha daohi gainbaha

Simisah phusilai graosih jathing, lamsih jathing.

Daomah masi khrangkhabo daohkho gblaithing.

Burunmah masi khrangkhabo burunkho gblaithing.

Rangkhoh bupra jathing, mairijing bupra jathing.

Rajani nokhohah thangkhabo slaijuh sehm gnang jathing.

Brai Sibarai Amang Gamadi angkhe khlimya ningkheseh

khlimba,

juthai; Dei baijala.

Maising grah bothor laibani yahonhah sohphaidu guduung bothor. Eboh bothor phdain, hadam'ni khusi jensongmani bothor. Maithaisini dangba sabkhaseh, dangba rankhaseh thaiba bangma, maiba bangma. Odebani, khraorao ar radaoyarao buthu nagarao, jalairaokhe dangba khajakhurimane rjabhi thire. Boh rjabthai jakahade edehe —

Maithaide gidinghi laibukha
 Kharade phaophinhi phaibukha,
 Maisingmah daindoh laihbani
 Jalangmah daindoh phaibunang;
 Thuhide modiri dalaihsih
 Khamhide silingi dalaihsih,
 Jalang daindoh dangkhaseh
 Maikhoh mairijing maisongma.

Jalang'ni bothorsah jenjenyabakhe hajikni Dimasarao 'Hahduhthor' thire. Eboh bothorhah mai, manglai, bthai-bikhim'ni bumuh phadainhah gaisingre; khudi (small spade) jahng hah khurhi orah bumuh sehngpha langbakhening 'Hahduba' thiba. Eboni yahonhah buphang dekhuphaibahah samsah brekhuyaba buthukhe phikhurma nangboddu, boh bublikhe 'Samphitor' thidu. Ebohni yahonhah 'Yaosra Repthor' odeh 'Mai rathor'. Eboh bothor buthuhah, sgangthaode givin buphangsah brekhuyaba buthukhe phikhurhi lemkhlaitharre odehe yahonthao songi jahng mai rakhui sugure.

Eboh bothor buthuhah nagarao mathlarao khusi danglaibahah khaja minibo jalaire. Khram dobong, Muri Wathesah, Suphin odebasi damhi rjabre. Bonsini khah khajakhuhi khathaini graothai rjabthai jahihh khuhah brekhuphaire –

Naga : Barsiri saraseh bar phaidu
 Dung'raothi gisibsah yaodiba.

Mathla : Braning jing'raola gisibsah yaodinang
 Hamrim songbani barsara
 Bokheseh daraola gisibsah yaodiba baolaba.

Naga : Disiri saraseh di phaidu
 Jang'raothi khnaijuh di saihba.

Mathla : Baraning khnaijuh di saihnang
 Ahsari badainni thairesah
 Disara di saihlaba.

Mai, bthai-bikhim sugublaibani yahonhaning Hasaoni Dimsarao sganghah dangsoya thaoyaba odeh nang gdainyaba khusi buthukhe danglaire. Boh buthu jakhade 'Nanah Besehng Jiriba' odeh 'Maimuh

Tharba'. Nanah hajaibaha naisoh nuhsoh jayarao Hojaijikrao'khening nanah besehng jiriba thiyaba bumuni khusihah manlekha yaophabaseh. 'Maimuh Tharba' jakhala asaba subung thihba yahonni gedeh khusi mongsi. Nanah besehng jirima ba maimuh tharmani thip basain joradeh gri. Asaba sainkhalihabo nanah besehng jiriphudu; thikhabo nanah dekhuruba ba haphrang mairuphaibani sganghaning eboh khusikhe dangma nangdu. Olaining Maimuh tharmanibo thip basainjora dongdaoya, nohkorni sarangba blaiba maphi asaba basain-bohor (tarik) khokhlaihi maimuh tharlaphudu. Thikhabo ebohah nangyaba jakhade mang'githi saohyaba basainni suru suruyaba yahonni basain hah maimuh tharma nangre. Graode mang'githi haithibari saohkhala simbari, marbari saohkhala bubari basainhah maimuh tharmani tarik khokhlaima. Edenihade eboh githini maimuh tharbani khusikhe khribbo blaihdusi 'Bisu' jibothorni sganghah dangre. Niyakhahah maithaisini khajabilihah khajaphuya, Bisu jibahah gabahphuya thaore. Bohaseh maimuh tharba thiba. Gathar jakhaseh Bisu jiphuba. Graode Bisu hah gbama thikhala sganghah 'Jumangsaoh Khainba' odeh 'Maimuh Tharba' khusikhe dangma nangdu. Jumangsaoh khainmani basainbo maimuh tharmaneh basain khokhlaiba daralaining. Ebohni lugu ar dara mungsih dongphayaba jakhade – githini khusikhe dain daokhlaibahah odeh gthangni khusikhe dain daokhubahah dangma.

Mai sugublaibani yahonhah nohlaihah Bisu jilaimani grao dongkhala nohlaisarao jar jarraoni nohlaineh khalalihi basain khalairare. Bisu jadi mungtham jadu– Jidab, Surem odeh Hangso. Khasedaonthaoyaba Bisu jakhade Jidab; eboh Bisu sainsi nising saintham sohsihni. Surem Bisu jare sainbonwa sohsih. Dedaonthaoyaba Bisu jakhala Hangso Bisu. Eboh Bisu sainsni horsni grim grim jare. Surem odeh Hangso bumuni Bisu magnini khlaihide maithaisini dangbothor jenbani sganghaning grao jenlaihi thilalihi mathaolaima nangdu. Sumuni thikhade ebohni khlaihi khaoyung danglaihi fund slamma nangba bangbani. Rahng-rih, mai, bthai-bikhim nangba bangbani smaba bedeba thikhade eboh Hangso Bisuni khlaihi naga, mathlarao khaoyung yaogong jrulaihi sining thaoya gibin

khlahi Phadain danglairekho.

Bisuni thangdaothaoyaba buthuhah dongyaba jakhade khaoyung jilaima, linglaima, bailaim, luhlalima, mlao badailaima odebasi. Mlao badai buthuhah dong– Harong baiba, Longthai Lemba, Duhung Sikba, Rimin Nehlaliba odebasi. Baiba-luba, Khram-Muri, Muri-wathesah, Khram-dobong odebasi dambakhebo badailaire. Bisuni thangdaothaoyaba mungsi jakhade Bisu Gaba thiyaba. Ebohah rayarao, khraoraokhe khlimre. Bisuni majangsisiyaba mungsi jakhade 'Phangsla'. Eboh daoglabkhe wahduh phnagiyahi wah mahmahng jahng dangre. Murithaini graothai buthuhah somajni dangrimin, jarimin odebasibo mithijaophadu. Thaisi-thaigni erahah sugudu –

Jaobani –Thangphu yamuh adungrao

Goseh goyaba

German Jbah jabanise

Thangma galaiba.

Jaophinbani – Nagajahng Mathalajahng khorong khalaiba

Hamhi jaya lugurao gal seh nangsiba

Meseb hamyabaniseh khorong gasiba.

Jaobani – Ansarao ansarao diha dathang dei,

Sorerema biringdu Dimbong biringdu.

Madai Khlimbani–Ajuthuni saohabo Phamdaikhe khilimba

Adaithuni saohabo Mamdaikhe khilimba

Duhah jini saohabo Phamdaikhe khilimdu

Duhah jini saohabo Mamdaikhe khilimdu.

Bisu khrib jahng khajasmalaimani, krhao-ansa, naga-mathla, miyah-masainjijik khribbo bohah khaja khaja, mini mini. Rih-jem gdain odeh gainsari phinsari gainhi phinhi khribbo saothar, khahthar. Bisu khajamani seh, orah dukhu grai, waimu gri. Dukhu-hadi blaohi khajahiseh Bisu jilaima nangba. Odebani khraorao, radaoyarao sibringhi rjabdu –

Hai Sibarai ribani sain maiba

Basainkhe rikhi sain maiba

Saninjra dohhijjahng sain maiba

Horjra dohhijjahng hor maiba

Waimusah gilibo wai danang
Mirimsah gilibo di danang
Waimude nangdaore bangdaore
Waimukhe khramthong khephreha
Khajakhe nah suding sukhuha.

Bothor jahng dophayaba rjabthai buthuneh barabo, Dimasni khuni sahitya (oral literature) hah rjabthai gibin dongba bangbi. Graokhening thinang – nagarao-mathlaraoni khah-muh nanglaiba nising khakhujaoyaba Majangdini Rjabthai, jarimin jahng dophyaba rjabthai-Disruni Rajabthai, Halodaoni Rajabthai, Silikhadini Rajabthai, Hariphani Rajabthai, Maibangmah Haigarbani Rajabthai odehe nanaraokhe pholaba thuribahah rjabyaba Nanah Thilikbani Rajabthai odebasi.

Dimasarao thilaiba, jolaiba belebhah graosol-graokhandi (proverb) khebo yawaiba bangbi. Eboh buthu graothaikhe thudao, majangdao slamkhudu. Olaiyaba thaisi thaighi –

Nanah graya buma jiriya
Graba thaoya buma dangphrangphuya,
Dangbudi gnangneh hah nangya
Daobudi gnangneh khun nangya.

Thumaisikhe msaphuya
Limmaisikhe hamriphuya.

Jubalangi jukhabo barjahng bailangre
Hihbanglangsi hihkhabo borun waimrore.

Apna mahng gbao
Mlai thong gbao.

Graode jodaore bangdaore
Honde sudaore yerdaore.

*English jahng rehpdongyaba eboh rhpjuhkhe
grao-dimah jahng thaislaiba Biswajyoti Barman.*

Dimasa Khuh'rgai Sahitya : Naiphla Naigasih

**-Biswajyoti Barman (Daolagajao)
Silchar**

Bhartni sainkhlip sainja haphai thinang thikhade jadi johmsah (tribal) raoni dongyam hayamseh. Habsao-prokritini majangthai, gjaothai-guphuthai jahng gablaiyaba eboh haphaini dongyam hahyam'ni subung-jadi givin gibinni dangjithai daogainthai habo habsaoh prokritini olaiba lalithai dongphaba mithijaodu. Eboh haphaini gede khaseh jadi-johmsah maphrong'ni yawairiminbo yawaiphabuthai jahng gnag-gujuning. Loko-sanskriti (Folk Culture) rjabthai-grathai, baihthai-luhthai, gainsari-phinsari, jithai-lingthai, dharmoni lonthai, Mdai-haithi odebasini maphrong'habo dubo bonsini jarni mithirimin dongba jnabikho. Loko Sahitya (Oral Literature) ba khuh'rgai sahityahabo olai jarni mithimin odeh majangthai dongbakhe nuba maidu.

Dimasa jariminhah mithijaodaoyaba eboh haphaini thangdaothaoba jadi-johmsah masi. Assam ba sainkhlip sainja Bharat'ni jadi-johmsah buthuni bisinghah jarni mithimin dongba thangdao. Eboh haphaihah jadi johmsah buthuni khaisa khusu raji-raja dongyabasi buthuhah Dimarajyo thangdaothaoba masi dongba. Raji-raja buthu thanghi dongba maithai rjah jisuguh ni gejer hatho belep sohsih. Jariminhah Dimaraji 'Herombo Rajyo' ba 'Kachari Rajyo' thihi mithijaore. Jabbah-misih odeh givin givin rajkanti (political) jathaini khlaihi Dimasa rajaraoni rajathani Brahmaputra dibai haphai nising Dimapur, Maibang, Khaspur jahi Haritikor sohsi disailangma nangba.

Eboh haphai buthuhah maithai rijing jahng raja'jiba sainkhalihah Dimarajaroo Sanskrit aar grao gibinkheseh raji salaimani khusihah yawaiba. Odebani, rajasaoh'hah grao-dimani rehp-saohkhuli slamkhujaoaba gri.

Thikhabo Dimasa Loko-sanskriti odeh Loko-sahitya gbangning gnag-gujhsehmu. Rikhikhringraoni graothai jakhade yawairimin'ni dilam Mahabharatni jug nisingning daohi phaiphabulaidu. Odehjahng yasing garuh jahi bahsugu khrangkhu japhabuhni bonsini sanskriti (Culture) hamkhuphuba. Dimasa kuhrgai sahityo odeh sanskriti maiphahi rikhikhring Jaganath Chakraborty thiyabakhe erahah grao-dimda jahng thaislaihi ridu, " Bharatni sainkhlip sainja haphaihah lokosahitya sanskriti hah gnang jakhuyaba khaisa khusu jadi-johmsah dongyaba buthuhah Dimasa Kachari thangdaothao.Dimasa Kachariraoni gbangning gdah gajainni sanskritini yawairimin (Tradition) masikhe jing maidu. Elaijadi sanskriti dilam phrah-phri jahi thahngghi dongre boni srutisahitya (Oral Literature) hah. Aar eboh khanaphabuhni khahjuhi dengphabulaiyaba sahityo ba lokosahitya'ning jarni adorsho, daranitini ringthai odeh mulyobodh'khe rimsongghi denghi somajkhe mathakhuh dengre. Dimasa somajkhebo khabolmah rihi duh sosih gmahmani yaoh nising sogohi mathangkhuhi dengbaseh.Rajiraoni thangrai-daogari, dara-niti slingthai, lonthai-slamkhuthai odehe khahmuh yerma phaihmani khusikhe danghi phaidu bonsini hamkhuh gujuhyaba lokosahityo (Jahid Ahmed Tapadar; Dimasa Lolokatha, Haflong, 1996 A.D. p.- 11)."

Gakhranglili blaih-budung, bubar-bthai jahng majangrili mjangkhuyaba Dimasa kuhrgai sahityani hakhli guwar gablaihi dong- graograh (mythology), bihthai-basithai, rjabthai (phdain dangbani rjabthai, nanah thilikthai, hamjaolaibani rjabthai, jukhuba-disengbaha thiyaba sol-graothi, grah-sihmahng, rjab-kharimin), mukhrithai, graokhandi-graosol, banggaithai, kharimin-badera odebdasi. Subung jibonni suk-dukhu, khaja-mini, khamah-khasah dongphayaba eboh khugrgai sahityani khrib phanthahabo sahityani gibi gibiba thaomah, dihmah, majangthai-lalihthai jahng gablaikhudu.

Eboneh bara eboh buthuni jarni jagibinthal odel jarni jasonghal dongladu. Erahah jing eboh buthukhe maiphahi khaish jadanmah gaopharima nailainang.

Dimasaraoni Mdai khlimthal-sowathal jahng dophahi dong bonsini Dilaobra Sangibrani graokhandi graograh. Eboh bonsini daohi phaibani kharimin grah jadaothaoyaba janaidu. Jariminkhring'rao Upendra Chandra Guha (Kacharer Itibritta), Nalinindra Kumar Barman (The Queens of Cachar or Herambo and the History of the The Kachchhari) odel Uttam Chand Barman (The Dimasas and The Ancient History of India ..., Vol. I) jar jarni laihsihah Dilaobra Sangribani graokhe rehp'phadu. Bonsi rehpyaba thaneh khaisa gihin jayabakhe jing erahah suguhih ridu. Dimasa hojaironi Mdai basithal-bihthaiha eboh gebrengphahi dong. Hojai Mdai huba-bibahah birili hosengphahi ebohkhe thire.

Dlao yaoda Sanggi yaosi
 Hajeng mogonsih Dobong phulili
 Haphlai Halai nusohphuyasih.
 Dlaobrahah Sanggibrahah
 Prap dehsari prap phangsari.
 Yader khormaidik bosho damali.
 Yader mih rijing bobo miliba.
 Bosoh daoh rijing bobo gthaba,
 Hayung hakhabo laihsih graiya
 Baryung phaikhabo debsih gaonangya.
 Tiga giridao baiga giridao.
 Mdai adhasih Marsi adhasih,
 Daohih phaiyarao luhih phaiyarao.
 Mathai baibani khra baibani
 Maithai gidingsi khra phaophinni
 Melmah khamjoya melsah khamjoya.
 Melmah khamrene melsa khamrene.
 Phirthi gilihah phalang gilihah
 Sangsailairene bowailairene.
 Baoba maiyabo baohonlaibane

Hojai giribo hojao sangsaiba
Barowa giribo barowa bowaiba,
Hojai jabbane barowa baobane.
Mdai thikhabo Haithi thikhabo
Baipha jiphuya baipha lingphuya.
Hojai bikhaseh barowa thaikhaseh
Mdai bsahrao Haithi bsahrao
Jimuh mairene lingmuh mairene.
Yaoblai gnagdao Phothai gnagdao
Yaoblai riyade Phothai riyade
Jiphain gmanang lingphan gmanang.

(Bahimanta Langthasa; Kolongma, Silchar, 12 December, 1986 A.D.)

Dimasaraoni gdah gjam jadao thaoyaba lonthai buthuhah
thaoda othaoba aar masi jakhade Phatrini graothai. Rajihah ba
nohlaihah jadunglaire, jaya-hamyā jare, jabbah-mihsih raore, thiphling-
baiphling raore thikhade Dimasaraoni Phatri gariba dara dong. Dara-
phangsa manihi Mdai khlimba sowabani yahonhah beseh gathar
phaihi Phatri'ni saohah gaphaima. Bohah phatri- jagneyaba
hungneyabakhe thida sgang thidahadu. Phatrini graothai jing nalai
khanayaba, thiyaba joyaba grao tha khaisa jadi givin. Eboneh bara
rili'gnang Graokhandi buthu khaphari gnang, saohkhuli phunuyaba
ba sangketi (hints) riyaba.

Sibarai mukhang phinkha,
Iswar denegao degaokha. 1.
Hungelao hungmakha
Jagelao jamakha. 2.
Grang gri Singao birma
Nawairaja phaima. 3.
Dimaih gilikma
Longthai galangma. 4.
Yaga gri Dolai khaima

Duhyung khonma lama lama. 5.
Buphang bakhla bahngbasi
Hathai khmama dongbasi. 6.
Nawai raja sainsi thanglama
Thikhabo besede thaolangma. 7.
Riminsi khamjanang jekhali
Sainham phinnang okhali. 8.
Sibarai giding naibonang
Iswar khasao phaibonang. 9 .

Jing sganghaning thiba, Dimasarao haphai guwar gablai raji khamhi, raja jiji phaiyarao. Bonsini boh sainkhalini grao thiyaba dong-grao-khariminhah, kharimin-rjabthai buthuhah. Rjabthai buthuhah thijagothaiyaba jakhade Dimabong Halalini, Dimapur Haigarbani, Maibangma Haigarbani odebasi. Ebohne bara dong Longlabdao-Halodao, Disruni Rjabkharimin, Dehmaluni kharimin odehbasi. Rjabthai buthuhah bumathanikhe khasaothai, hamjaothaini graothai dongbani lugu lugu bumahthani majangba lalibani graothaibo dongphadu. Bumathanikhe haigarlangbilini khadukhuni graobo boh rjabthaihah mithijaodu.

Maibangmah halai warba waryaba
 Daindoh himkhabo himdeya,
Maibangmah dilali laoba laoyaba
 Daindoh birhibo birdeya,
Maibangmah hah hamba hamyaba
 Blaitha bthaiseh bangdaodao,
Maibangmah dihamba hamyab
 Longthaitha nahseh bangdaodao,
Maibangmah gaya garkhade
 Maibangmah hagara jalangnang,
Mosohmah yajongdi hah lanang
 Nahphimah khudabdi di lanang.

Dimasa khuhrgai sahityani masih gedeba sompod jakhade

kharimin gnag rjabthai (Ballad) buthu. Rjabthai buthuhah jariminni upadan (Elements) dongbalaining saohkhongsi odeh dangkhaoyung'ni ringthai, haphrangtahibo dongphadu. Eboh rjabkharimin ba ballad buthuhah thijagothai buthu jakhade— Longlabdao-Halodaoni Rjabkharmin, Disruni Rjabkharmin, Dehmaluh Amahluhni Rjabthai, Silikkhadi, Snemduri, Haripha-Dumaidini rjabkharimin odehbasi. Eboh buthuhah raja-bisik Disruni thangrai khe bonoh slamhi khakhuyaba rjabkharimin gbangning khabaisisi. Songthethe khilaihi boh rjabkharimin khe erahah rehpu.

Hariram rajani bisik Disru (Dehsrik). Bumah jakhade Rani Khimsuri. Disru bumani hohah dongbahah sehngyah-meleng laphahi bupha miyung guphu rimmaneh thangba. Odebani nohah bupha griba sainkhalihaseh Disru hajaiba. Bsah hajainang thihi aasa khilailaiba. Raja sanilangba, sik'seh hajaire thikhade muhsni thuhih hakhor khuhi orah phibthing. Aar bsah hajaire thikhade gjaohni thuyamhah thurithing, guphuni duhlemhah msaothing.

Thikhabo khribkhe khah saihihi bisik'seh hajaikha. Majangsisi guphumah, dainmukhang'lai disru'sruh, sainlai jnadu, dainlai laidu boh nanah. Raja gejebthithi sanilangba thibanila bokhe bedehethaikhmaphuma ? Staikhmaphuya. Rani'seh jalaba thikhabo Khimsuri bo bumahseda. Aanumahnibo olaining grao thaisi. Odebani Rajani Malini nohah Disru dekhukha, jukhukha.

Ejahng gedehe noh'hah gidingphinkha Raja Hariram. Lughah labuphakha Mihyung guphu. Bohade Disru bo majangsisimah mathlasah japhaikha. Sik'seh hajaiba thihi rajaneh khanarikha odehe raja sanilangba laining khrib jadi dangtharkha thihi khanarikha. Gibin gedehe Disruni basaohah rajani muthai glaiyagothai blam khailaika. Thikhabo Lairidi rehphi haihayabakhela marsiraola slaiphurethi. Sainsibakhali malini khimbarikhohah mathala jasoyaba Disrukhe nuhkha Hariram raja. Disrukhe majangjaohi rajala bokhe jukhumaseh baikha. Thikhabo olila janing jathaoyabasehthi. Odebani gibin mussi blahm nuyahih raja sanilangba maphi khusi dangyakha thihi rajaneh grao gibikhe thilaikha. Aanumah, Mintrirao, Khringrao sakkhi rikha.

Odehjahng rajabo Disrukhe boni bisikseh thihi lonma glaikha. Thikhabo raja'nohkhoni sorojontro jahng sthaijaomaneh saja rijaoyaba rani jarkhe gathari jahng hahngkhma khlailakha. Gibin gedehe Disrukhe raji nising thanglamani saja rikha.

Disru aalang aalang buphanihah bihlakha, thailakha bokhe saja riyabakhe suguhaneh. Thikhabo raja boni graokhe gainba gri. Odehjahng raja-sisik buphani raji haigarhi thanglaneh baigokha. Lughah thangphakha rjah rijing perja, melengrao; lughah thangphakha mihyungkhoni mihyung, goraikhohni gorai. Daoh mih bangbasih khabaisisih grahkhukha. Bangla phaibalai maokhukha Hariram'ni raji. Bohaning raja jarni gjaibakhe haphrang maihih bisik'khe gidingphinmaneh kha'jahng muh'jahng thilakha. Thikhao bohade baogejebyaba Disru buphni rajihah phungsih mamahngbo dongma baoyakha.

Dongbani bumu'jahng ahng dongyakha

Gajaoya di-glaoh gajaohnang.

Donbani bumu'jahng ahng dongyakha

Giphinya warmih giphin'ng,

Aasimkhe mah longlanang

Thurukhe pha longlanang.

Dongbani bumu'jahng ahng dongyakha

Haridao babani nohsainkhlum ahng gayakha.

Ebohni yahonhah Disru Ahom Raji, Manipur Raji, Magam Raji, Thuruk Raji jahih bjangbai mithiya tharmiya desh gedehe thanglakhaneh. Dabo, Disruni kharimin rjabthai jahngning thisoarthbaseh. Erahah songthethe khlaihi rehpa khaisah mithirimani baothai jahng. Disruni kharimin dinibo hamjaomah jahng khasaomah jahng Dimasaraoni khah-muh maphrongkhe khabirilangdu, mubairilangdu.

Disruni rjabkharimin laining Longlabdao-Halodaoni rjabkhariminbo. Eboh khariminde phinsi jahngning Dimasaraoni khah-muhkhe khabaibo khabairidu, sangdedebo khlaidu. Halodaoni rjabkhariminhah khahdukhuni rosni lugu Vir-rosbo dongphadu.

Halodao jakhade Vir Longlabdao odeh Vir masainjuh Waibahngmahni Vir bsah. Vir Halodaoni gmangthaosisih raomah-bolmah odeh khomota dongbaneh. Boh buphakhe sogomaneh jabbahah thanghi Asum sengyaraokhe saohjahngning dekhribtharba thidu. Thikhabo jabbah jambani yahonhah gathaisihhah sehng yaodi, khaodam odebasi denghi dikhonsahah yaopha jahng di khaokhulungma jabamuhneh; bohaning thimhi dongyarao jahng dainthaijaobane. Halodao hajaibani sganghah Hjaoijuh sma naihi thibaneh, Halodao hajaire thikhade 'thirijuh waijahng khamnang, makhading wool nangnang' thihi. Songket riyaba elai graothaini thaiphin hah Vir'bumah Waibangmah thibane—

Thirijuh wai nangkhade

Ahng Halodao buhmah, thirijuh wai luhthainang

Makhading wool nangkhade

Ahng Halodao bumah, makhading wool ahng phainnang.

Yahonhah basain sohba jahngning Halodao hajaikha. Khre khre dekhuhi nagasah japhaikha. Boh nohah phainphinya thaoyaba buphakhe smaimane thangma baikha. Bumah, bumhyung odeh Hojaijuh magnabakhe gainyahi buphani sehng-phih smaikha.

Babani Phih'khringkhe rihadi

Labudi sehngkhringkhe

Drang'ni khorongkhe naihinang

Rusihih ahng phinbunang.

* * * * *

Longlabdao bsahseh ahng Halodao

Daohglab khuru behngyahrao behngsahrao—

Khuruya daohglab birphlai ahng thangnang

Drang'ni muluk'khe ruphathar ahng ruphainang,

Nailaphai drang'ni subungrao nailaphai

Haih-Daohling haihbakhe nisi nailaphai.

Dimasa khuhrgai sahityani phantha bangdao buthuhah dong jadi givin givin rjabthai— Bisu-jibani rjabthai, Majangdini rjabthai, Makthisah-Makthijuhni rjabthai, Phdain dangthorni rjabthai,

Daohnaijuhni rjabthai odebdasi. Bisu festival jakhade Dimasaraoni thangdaothaoba festival. Mai-di sugublaibani yahonhah maigdain jibalai eboh utsobkhe manilaire– baihlaihi-luhlaihi, jihlaihi-linglaihi. Eboh Bisu jiba jahng dophayaba rjabthai jakhade Bisu Jibani rjabthai odeh Bisu Digarbani rjabthai, Bisu jibani phanthasini rjabthai edehe–

Ning mijing ahng mijing sain maiya

Gabara ribani sain maiba,

Ning mijing ahng mijing hor maiya

Gamadi ribani hor maiba.

Dinini sainraoli basainkhe jing

Rikhi rikhi phaiba,

Dinini hor'raoli bohorkhe jing

Rikhi rikhi phaiba;

Elaiba sainraoli basainkhe

Gjaohjahng slaihibo mainangya,

Elaiba hor'raolli bohorkhe

Guphujahng slaihibo mainangya.

Phadain Dangthorni Rjabthai :

Nagarao : Barsra srasesh bar phaidu

Dungraothi gisibsah yaoh diba.

Mathlarao : Dungraola braning gisibsah yaoh dinang

Hahmirim songbani barsara bar nangba.

Nagarao : Disra srasesh di phaidu

Dungraothi khananijuh di saihba !

Mathlarao : Dungraola braning khananijuh di saihnang

Disakhong songbani disra di nangba.

Khah-muh nanglaibani rjabthaibo Dimasa rjabthaigrani khaojebmah'hah aongyaba thangdaothaoyaba masi. Khah nangthai muh nangthai ! Dabo bola habsaoh khunglang jahng'ning, boni hari giri, khorong gri, basain-bohor khribjahng gablaihih dongyabaseh. Thikhabo bohobo somaj ba jadi masini jarni mithijaothai biyam

donghadu.

Khah Muh Nangbani Rjabthai :

Majangdini saohrili
Nokhasaohni daingili,
Aasim gaphlai thangkhabo
Thuru himphlai thangkhabo-
Majangdide aajangde
Hahbilling'ni khimsahlai
Khahah Babili.

Dimasani dangjithai daogainthai, samajik rahng-rihni blahmnisihah Nohdrang (Bachelor's Dormitory)ni habbah dehbi. Duhbo Dimasa dongyaba haphai buthuni hah guthu nohlai buthuhah nohdrang dongkho. Nohdrang nagaraoni horni thuhthani sining niya. Eboh nohlaini dangba-jiba, baihba-luhba slingthanibo. Nohlaini nagarao erahah hoba-sihba, yaoni khusi, damba-suhba, baiba-luba, mlaothai-minithai odebasih slingre. Eboh nohdrang maiphahi rjabthai dongyaba 'Nohdrang Thuba-Masabani Rjabthai' thihi mithijaore. Eboh rjabthaihah sibringthai dongphadu.

Nohdrng Msabani Rjabthai :

Naijuni daohnaijuh rmaohkha,
Adungrao smaohkha smaohya;
Naijuni daohnijuh bringkha
Aajangrao baijakha baijaya.
Baijahi hagongmah gaphaidi
Smaohi jenthermah luhphaidi.
Baijahi hagongmah gayade
Phaniba dangbudi gamare,
Smaohi jenthermah khamyade
Maniba daohbudi gamare.

Nohdrng Thubani Rjabthai :

Horsini hor phaiba phrangla

Thuhining mudiri lailadi;
 Thuyalai hakhongmah gakhade adungrao
 Nohdirong suh'gongkhai gadare.
 Horgejer dikhongmah lukhade adungrao
 Duhkhaning jubu jarene.
 Saohaning kharimin girinang ajangrao
 Kharimin belebbo jajaonang;
 Khanadi adungrao khanadi
 Thuhining mudiri lainang phai.

Aasaba somaj ba jadini dangba-jiba, daohba-gainbani habsaoh
 dedaoyaraokhe maiphahisining niya. Basah basah aansaraonibo
 elaibahah habbah dongphadu. Odebani nalaini khusi haphraini lugu
 nanah thilikbani rjabthaibo dongphadu. Boni lugu dongphadu
 nanahraoni mlao-minini graothaibo. Nanahraokhe khribthanekh
 khajadaothao khajaridu khimbar odeh dain. Odebani dainkhe laphahi
 mukhrithai renthamni mamahng jakhabo gbangning orthognang.

Oh Dain Oh Dain
 Markhu khasa labudei
 Jabbah dainlainang.

Sengyasah aansah, jabbahah thangma. Odebani dain'nihah
 markhuh saindu. Dainhah dongyaba grahjuhni graokhela mithiduda !
 Dainhah gederangmah phrahphang phangsih dong. Boh
 phrahphangkhlahah dainni grajuh mai sudu. Grahjuh sainjahng
 horjahng, jlang-maisehng mai suhphaphalangdu thajora grisih.
 Odebani boni markhu gmangya. Sganhah jabbah thangbahah
 markhu, marjuh baphalangbani sol dongba. Odebani sehngyah aansa
 dainnihah markhu sainlaba. Edeh jahi jabbah,dain, dainni grajuh
 odeh aansaraoni mlaothai bedeba jahih boh renthamni mukhrithaihah
 phlaisih jalanglakha. Aansarao mlailaibahah thiyaba gbin mukhri thaisih
 jabokha edehe—

Eang eang bulala
 Bonjuhlaih gelaowa,
 Aargodi jahng Norosing,

Sring sringba Norosing
Baihleh baihtah gonthaisah
Laihthori gidingba
Bonikhe dainsoh.

Ansarao yaophakhe baklahah hahah biliphi baohi dengre odeh boh mukhrithaikhe thiphalanghi yaosih sainsohphalangre. Sreni bilaiyaba yaosihah 'bonikhe dainsoh' graothai glaihidu, boh yaosikhe phaithephi dengre odeh phin sainphinbore. Elai thiphalanghi phaitheplanghi sreni yaohsi buthu sgangthao phaithepjaothar're, boh mlaothaihah deyama. Eboh graothai ba mukhrithaini bising'ni aasaba ortho dongthi, grithi mithima raohsabi. Thikhabo Dimasa rehpkhring saohsih Soroj Kumar Barman'ni graothai maphide eboh mukhrithaini ortho dehbi. Sangsaigthai-bowaithai (srithi, creation) ni lugu eboh graothai dophadune. (Rikhi'guthu rikhima nangjaoyarao ebohke baohi nailaphure odehe 'Hudang' hah baigoyaba gedemah Barman ni rehpkjukhe phorilailaphure.)

Erahaa aansaraokhe pholayaba mukhrithai thaisikhe rehpphama nangrekho. Eboh mukhrini biyam edehe— mnag bakhaliba sain brebani lugu luguning nanahni bumah-bupha phdainhah baigolangkha, sainbli japhaikha, bumah buphani khilaihi nanah gradu, nohah nanahkhe raokhihi dong bubi. Bohah mukhri thihi thihi bubi buphulungkhe pholama naire.

Eang eangmah biringkha
Mamah Baba phaidikha,
Thaisum bojor labunang
Manglai bojor labunang,
Bahbaihasih bahbainang
Bambaihasih bambainang,
Haplaokhrohah khamrinang
Pop daijinang,
Luguraoneh khlepsih khlepsih
Adung gajaohneh khlepgni.

Yawairimingnang eboh khuni sahitya duhah rayaraoni baothaih

khuhthaiha mamahng sining thang'hi dongsiba. Dini sainkhalini laihsih ringdao, slingthai yerdao japhalangbani lugu lugu Dimasaraoni khuh'rgai sahitya gmahphalangdu. Dabo, mlaini grao gibin gibin jahng Dimasani kharimin'grah ni laihsih khaisa khusu baigokha. Boh buthuhah grangsih grao-guphusah, grangtham mamahngde grao-asum, grangsih khlaihi grao-bangla odeh grao-hindi jahng baigokha. Duhah grao-bangla jahng grangsi baigoma jahi dongkho. Rehpsuguyarao jakhade- J.D.Enderson, Nogendranath Barua, Nirupoma Hagjer, Jahid Ahmed Tapadar, Abadesh Kumar Mishra, Bhishmoram Barman thu. Ebohneh bara khaisah khusu rjabthai, kharimin odehbasih laihsi gibin gibin buthuhah rehpsugujaohi dong. Thikhabo grao-dima jahngde boni kharimin grahni laihsi grangsih baigokha thihi eboh rehpu rehpyahsahde mithilaya. Gibin gibin magazine, periodicals, rmaolaih odebasihah sahkhao degao jahi khaisa khusu rjabthai, kharimin grao-dima jahng bigokha. Grao-asum jahng thaislaiphayaba Dimasa rjabthaigrahni laihsi grangsi baigoba 1982 maithaihah. 'Dimasa Hokolor Geet-mat' bumuni eboh laihsikhe rehpsuguba gedeh Asomiya rehpkhring, grao-dimani thaisehp (Dictionary) rehpyenyaba Nagendra Nath Barua. Asom Prakason Parishad, Guwahati ebokhe dihonba. Bai-dijuwah baithini khaisa khusu rjabthaini lalihsisah baigoba 1990 maithaihah. Laihsini bumu 'Benthai, Baimaijai Odehe Deejuhah Haphai'. Rehpsuguba Dimasa rjabkhring Phanibhusan Haflongbar. Dimasa rehpkhring-kobi Jatindralal Thaosen grao-dimani graokhandi-graosol smaikhonhi grao-bangla jahng thaislaiphahi laihsi grangsih khaikhoba 1999 maithaihah. Boh laihsini bumu 'Deemasani Sol'. Lailangyaba 2003 maithaihah Guwahatini Vibekananda Kendra Institute of Culture Dimasani somaj, sanskriti odeh rjabthai-grahthai maiphahi laihsi grangni khaikhokha. Boh magnihah laihsi grangsih jakhade 'The Dimasa :Child of the Big River', compile khlaiba P C Sarma. Eboh laihsihah morithai odeh gibin gibin rjabthai buthukhe grao-dimani lugu lugu grao-guphusah jahng thaislaiphahi riphadu. Thikhabo dubo jini khuh-rgai sahitya-hayamni gbangning bthai-bubar khonkhujaoya sugujaoya dongldukho. Eboh

buthukhe duha duhaning rehpsuguya thikhade duh srabning gmahlanglamasehthibo. Eboh khusihah khajayarao dehkhusgangrao sgangbuma nangremuh. Dima Hasao Autonomous Council ni Cultural Department buthu saoh nangdaoma nangremu. Dimasa Sahitya Sabha bophaidu, dangphaidu khajdasisiyaba grao.

Thikhabo sumukhe thinang, Dimasani graokhandi-graosolhah dongbalaiseh duhani jing Dimasaraode. 'Khusongde dibaikhe daokhure, Subungde jihbaikhe' thibalai Dimasarao phantha bangdaoning jarni gadaobakhe baohi jar jarni jibai dangbai gedehe khairu khailaihi donglailadu. Jarni daogari, dang'gari, yawairiminikhe bonsi gibi gibining khah-muh jahng hamjaodubo ?! Eboh buthukhe khonkhuhi rehpsuguhi hadailaikhade Dimasa sahitkya-sanskritikhe gnag slamkhudaobahah jurumah maikhamuh. Odehbani Dimasaraoni olaiba baothai khahthaikhe msahkhuma nangdu, sumu bilaiyaba baothai khahthai sainsi bonsini hamsih nangyaba graosol-graokhandi thaisihkhe slalmkhuriba.

Sah thihthing, raji dabaihthing,
Ahng thikhabo khumbar barkhuthing.

Dimasaraoni Grao-Khandi (Grao-shol)

– Dr. Sudipta Khersa
Silchar, Cachar

Grao Khandi thiyaba jakha loko sahityani phanta masi. Muluka dongyabasi jadini grao butuhah jar-jarni dara maphi grao shol, grao khandi dongbaseh. Grao-khandi buthu gdasao nising subung'ni bukhuh yerphalangba odeh jusenghi slaisenghi slamkhulangba. Olai masi hathani nising ar masi hathani daobai daobai dongyaba elaiyaba grao khandi subungni sahitya odehe samajha jarni hathani masi dongbakhe tharmaijaorikha. Grao khandi buthuni hajaiba basainkhe sahityani gobesok odehe jarimin lahi rikhikhlum yaraobo thiphuya. Bedehe thikala subung'ni khujahng slamphalangyaba, daobaihi dongyaba sahityase grao-kandi. Serese bakhali slam jenba bukhe saosibo thiphuya. Gdahala khajahng-khujahng'ning subung buthu kharmin, mukri, rjabthai odebasi slamkhulangbase, rehpdada thathihi dengya. Subung'ni khajahng khujahng yerphalangba odeh thanghi dongbani khilaihi elaiyaba sahityakhe khuni sahitya thire.

Odehe thikala duha grao thaisi baigobodu, bo jakha–gdasaoha subung rehplanglayaba laihsi jing maiya niya maikha. Graokhening thinang 'Ramayana', Mahabharata', 'Chaturveda' odehe gdasaoni muni rishiraoni sloka odebsi. Ayurveda sastra buthukhe rehphi galangbani khilaihi duhabo jini thanghi dongmani blamha boh laihsi

buthu waijim jahi jengphalangdu, bo laihsi buthu gmathaoya.

Thikhabo gdani boh sahitya buthu loko sahitya ba oral literature niya. Mnang gdani boh laihsi buthu rajaraoni kharmin jahng dharmo odehe gyanni grao sainthibani boh buthu dharmo laihsi thiyabaseh. Laihsi ringyarao munirao'ning dharmoni grao buthukhe rehplangba. Ar baisi gede jakhade loko sahitya sadharran subungni yaosandi. Gdahala gede gururao sining laihsi laibra silingmani blam maire. Sadharan dukhisa subungla khusi danghining thanghi donlagre. Laihsi-laihbra ringyakhabo busini baothai-dangthai-slamthaikhe baokhade negarjaya. Baoba ringbani dharajahng'ning bunsu thanghi dongbaha nuphalang-yaba maphi kharmin slamba odehe grao-khandi buthukhe juphalangba. Khajang-khujang mthanghi dengba busini khristhi sanskritikhe. Odebani darajahng loko-sahityani phanthaha dongyabasih khrib sahitya buthu rehpdada dengyabani khilaihi boh buthuni hayu, hajai basainkhe khaiphuyaba, mithiphuya.

Laihsiha rehpdada dengyabani dharajahng eboh loko-sahitya buthu gamaphaikha. Khujahng yerbani mulukni khrib loko-sahitya buthu thinang thikhade baosilainiing. Hah'jahng, di'jahng subung'ni solithai yawaitai gibin jabalainiing loko-sahitya buthubo hathani gaji jahng khisa khusu gibin jadu. Garaode subung'ni dara-disa, somaj, yawaitai-solithai odebasi khrib elaiyaba Grao-khandi ode kharmin buthu nising buphrang maijaodu. Jini Dimasaraoni grao-khandi buthuha subung sining niya dao-mihni bumukhebo jing maidu. Hagra bongra pdain dangba, misai sajibaiba ha Dimasarao hagrani dao-mihkhe hamsining mithiba, sumu jadi dao mih, sumu jadi rokomni busini griktai-baothai-jathai boh buthukhe Dimasarao naitaire. Odebani dhara jahng grao-khandi butuhabo subungkhe lahi grao gaobaha, subungni grao jenyahi dao-mihni bumu jahng grao gaobakhe jing nuba maidu, graokhening thinang - 'Dauka baijada mandap maijida' eboh grao-khandi jiri nokhor nokhorha nalai

yawaibalaining thinang thikade.

Grao-khandi buthuhah subungkhe grao gaohi thiba sining niya, subungkhe sibringbakhebo jing maidu. Grao-khandi khakhuphalang yarao danghi dihi thanghi dongbani lamaha nuphalangyaba maiphalangyaba dukhu-hadi, khoja-moja, jaba-jaya buthu nising saikhuhi-rukhuhi khakhudada boh grao-khandi buthukhe jingthne galangba. Bedehe dangkhala, bedehe solikhala-baokhala subung'ni hamdaonang boh graokhe baohining busi sibringyaba graokhandi slmaba.

Grao-khandi buthukhe thibabaha hamsining khnathaobi, bsa bsa mukhrithailai boni saogari. Thikhabo boh grao-khandi buthuni artho hamsining thubi; baokhade gmangmakhe sining thip. Bedehe olai majang sisi graothai baophuba gdani subung buthu ! Ahng hamsining jajaoyaba grao-khandi eboh- 'Khaokhlu habah dainba burunmah saoh migriba'. Tharmaima mijingdu, jini Dimasarao grah guru rao serening eboh grao-khandi buthukhe slamkha ? Bunsine ahng khilmphain riladu.

Danghi dihi jiyaba jadise Dimasarao. Jop khamhi dongya, dangthu thuning bunsu buthujahng mlau-mni japhalanghi lengbakhe sauha slowriyadu. Eboh jadi hamsining khajahi dongma nangjaoyaba jadiseh. Dimasaraoni elaiba graokhe busini khakhuyaba grao-khandi, kharmin, mukri, rjabthai buthu nising tharmaijaodu. Dimasaraoni grao-khandi buthuha miniithaosisi graothaikhebo jing smaiba maidu, bedehe thikhala busini baothai blengbi, hamsining saralse. Mlau-mni jadadaning baoba lailai jasisih grao khaha phaikhade thikhlaihabaseh. Bonsi baoba maire, bedeh soliphalangkhala khah-muh hamdaonang, bedehe mlaijahng khamlaima, songlaima, yawaima nangre. Odebani Dimasaraoni grao-khandi buthu bonsini kha-laiba maphi laikha thikhabo boh buthuni bisingha grao gibi dongbake jing nudu. Bonsini mithithai tharmaithai (experience) jahng

slamkhuyaba khakhuphalangyaba grao-khandi buthu duhabo jini dangthai-dithai aar soliphalangyaba lamaha hamsining nangphadu. Khani grao buthukhe elai lailolo odeh phlengdada thiba ringbakhe ar asaba jadini sahityaha nuba maiba gbangning sehngbi.

Duha Dimasaraoni grao-khandi buthuni bisingni othro (meaning) khe khaikhohi nailainang.

(I) Ahnihaning khamba ahni khaphorning phiba.

Eboh grao hamsining thubi. Jini samaj-rajiha dongyaba swartha (selfish) raoyaba subung buthukhe lahi eboh grao-khandikhe slamba. Jini subung'ni rajiha elaiyaba subung bangbi, bonsi khali jarini hambakhe sening baophuba, jarni khusi sajamma, hamba jamakhe naidada bonsi mlaini hamba hamyakhe baoba maiyadu. Asababo boni dukhuha jurukha naikhaa tikhede swartha gnanng subung jarni dukhu jamkhaning bokhe naisoyaba, dukhuha juruyabakhe blaolangladu. Odehe boh juruyaba subungni hamya khlahi jarni hambakhe jarima naidu. Jini samajha olaiyaba subung dongdubanining elaiba grao-khandi slambase— 'Ahnihaning khamba ahni khamphorning phiba'. Grao thaisi jahng thinang thikhade 'ahnikhe jiba lingba odehe ahnining hamya khlaiba'. Khaisa mirikhi solikhade elaiyaba subung'ni yao nising jing gophudu.

2. Sagang gede miyung lamglaiba nuya,

Yahon gede khaising lamglaiba nuba.

Garaola, rahng rih gnanngrao jarni khusiha dongma dongma bdam bdam khoros khlaidu. Nangdaoya thikhabo rahng rihkhe baoba lai lai haglai biglai khoros khlaibakhe bunsini khaha nangsengya. Bisilai rahng-rih, jikhu-lingkhu busini khani khajamane khlahi gmah gumuh jadu bukhe bonsi hisab dengya, naibo naihaya. Thikhabo busini rahng-rih, jkhu-lingkhuni phantha nising samajni hamba khusiha khaisa gbajuruma nangkha thikade, dukhisa buthune rima jirima glaikhade bunsini kha sahi brekhaoma jadu. Bukhede bunsini hisab

dengbodu, braha bisilai rima glaikha. Olai hamba khusiha bonsi khisa khusu ribakhe gmabalai jajaodu. Baisigede dongma dongma glai-gluh, gmah-gmuh jabakhe bonsi khaha laya. Eboh graokhe tharmairimane'ning ebog grao-khandi khakhuba. Muthaini prangsong 'Miyunglai (bdam bdam/gaphaosi) gmah gmuh jaba muya 'yahongede' sare-bare, hatho hatho 'khaising lai' (khisa-khusu) rahng-rih-jikhu-linkhu rima glaibakhese khaha mathaoba, khah saba.

3. 'Subungneh grao gmangya, magusaneh bondep gmangya.'

Ebo grao gibiseh, subung jadikhe mithiba haphrang maiba dubi. Samaj-rajiha kisim kisimni subungbo dongbase, hambabo dongbase, hamyabo donglabaseh. Thikhabo hamba subungla boni sainlaithai johlaithai, dongthai-jihthaiha'ning haphrang maijaodu. Bonsila hamya sainlaibaiya, subungma jahi dongbakhe ringdu. Baisi gede hamya subung buthula naidu bedeh khilaihi grao jahng subungni khah maima lonjaoma, odehe jarni motlobkhe khaikhoma. Khusi bera baikhaning yahonphinkha thanglakha. Phin Phin givin subungkhe phuslaihibokha hamba hamba thimaisi hibokha. Grikyaraonide musiba khalibo grao gmangya. Magusa buthu hagraha masi bondep nising ar masi bondepha baiphahi thangbalaining, olaiyaba subung grao thaisi nising thaisi slamphalangi mlaikhe thokhipudu, graoni bsaoha grao thapkhui muluk'khe phainjiphudu.

4. Daokhubani'bo goya, daokhlaibani'bo goya.

Baigingedebo khojaha glaibakhe thiba. (Bengali jahng 'Ubhay sangkat'). Jini thanghi dongmani lamaha khoja japhlungba bangbi. Hatho hatho jini kopal hamyakhade khoja jalabase, aar hatho hatho jingning soliba ringyahi, baoba ringyahi masi magin khojakhe jirikhi labuladu. Eboh grao-khandiha thiba motela subung goma naikhabo gophuyasi baigingede khoja phaihi phrangsong songphaidu. Graokhening thinang subung saosih mlainiha rahng jaohi hadi dangmane misib braikha, ejanggede hadi dangthuthuning misib

thijaokha. Boh subung baingedebo khojaha glaikha, misibbo thijaokha, hadi dangsophuyabani rahng jaoyabkhebo suba raoma jakha. Boh subung enjangbo goya ojangbo goya jahi thaokha.

Sreba sreyabala nohkorha grao banglaibaha bidini gedethi gbama, bumamuni gedethi gbama baoba maiyahi daokhubanibo goya, daokhlaibanibo goya jahi thaodu.

5. Toroga mathainhi thupuya, Khangkhrai khajaya jujaya.

Subungni charitrakhe maiphadada eboh grao-khandi slamba. Subung gosongrao baobalilai khusi dangdu mlaini hamba-hamyakhe bonsi baoba maiya, aar mlaini hamba graokhebo khanama naiya; mijing balailai solilangladu, odebani nokhor'ni subung buthubo dukhuha glaiphama glaidu. Olai khamao raoyaraokhe tharmairima thanghi thoroga mathainhi thujaya odehe khangkhraikhe khajayaba jujayaba jahng khapaba. Eboh magin khusi jaginglao-blaiglao, olaining khmao raoyarao, gosumthiarao, subung phathrao khebo thihi-johi jaglao.

6. 'Khaokhlu haba dainba, burunmah saoh migriba'.

Subungkhe maiphahining ebo grao jenbase. Jing subungni rajiha nalaibo masi niya masi jathai jahi dongdu. Mkhao-mithim, dolai-sulai jayabala donglaba. Olai jathaikhe rajiha phnangsengyarao, mkhao-mithim jayaraokhe remdada saja rima nangdu, Odeseh givin hama dangyaraobo khinma. Mdaine yaophayaba (boliha) khaokhlu haba khese boliha daindaba, khaoklukhe dainba nuhi burunma (boline khilai khahi dengyaba) sao migrihi baore hai 'O Iswar aangbo olaining dainjaoma jakha'. Olaining sasti (saja) maiba sining niya, asaba nokhorhabo kopal hamyahi jamane niyayaba jathai jakhade jingbo burunmalaining sao migrisingdu. Odeh mamangde dajathingmu thihi baodu. Grao thaisi jahng thima thikhala, mlaikhe gedeba khojaha glaiba nuhi jar khinsenglaba, dini mlaini jakha dakhna ahnibo jalaphurethibo.

Dimasaraoni eboh grao-khandi buthu jini thanghi dongmani blamhah hamisining khusi ridu. Gdani subung thilangyaba jolangyaba grao buthu grao mosol jathaoya. Muluk slai langlakha thikabo, subung'ni dangthai jithai slaikha thikhabo subungni jabaisi character'de slaiya. Bonsini baothaikhe mrikdaorimane khilaihi gda nising subung baohi phaidu. Duhah grao jakha jing eboh grao-khandi laiyaba graogibi buthukhe jini thanghi dongmani blamhah bisilai yawaidu ? Thima thikhade jarkhe hamsining grikhjaoladubani gdani gra-gururaoni graokhe ajaoma nangjaoya. Odebanining diniha gra-gururao galangyaba hamba blam buthu gmatharphaikha. Duha jini khusi jakha boh hamba blam buthukhe khonkhuhi-thatihii dengmakhe naima. Ar yawaiya thikade asaba bostubo gmah-gmuh jalanglabaseh. Dimasaraoniha tharmaimani, slingmani bostu bangbi, mlai jinikhe khonkhuhi langlabani saganghaning jing miriklama nangma. Dini dakhani phuriansarao eboh khusi hambakhe ajaoma nangre thihi ahng baoladu.

Dimasani Dara-Disa-Daramah odeh Daikhoni Khusi-Haphrai

– Najen Nunisa
Diphu

Khrihp subung jadini habsao sangsaiba-thoraibani kharihmin dohng. Madai- Haithi sangsaijaobani kharihminbo dohng. Olaiyaba kharihmin buthu khe engraji jahng Mytholgy aar Hindi, Bangla, Assamese grao beren jahng Looko Puran thihre. Jihni Dimasarao'nihabo ohlai looko puran ba mythology dohng. Eboh kharihmin, *Looko Puran* beren ja-rihmin (history) gibi jblaiyaya. Thihkhabo eboh beren niprang esaba jadi-subung (jono goosthi) ni ja-rihmin khe smaikhmani khaisa lamah nuhdu. Dharmo'ni yaderkhebo rikhiphudu. Ja-rihmin aar dharmo yaophani blihp – mathain. Dharmo aar ja-rihmin degaohi lamah hemphuya. Puilaha dharmo, bohni yaohonha ja-rihmin.

Dimasarao'ni Bangla Raja – Arikidima ni kharihmin (*Mythology*) niprang Dimasa ni dharmo, Madai-haithi bedehe baigo jenba, boh beren khe khaisa mithihaphudu. Dimasa hajaiba-thoraibani, muluk habsao, hahding-hahbauh, Madai-haithi hah'ni madai, hah'ni sagain, sangsaijaoba'ni kharmin jihni eboh mythology ha dohng. Dimasa ni eboh Madai-haithi berenkhe sowamani, bihma khohnmani, humagarmani khusi bobain-bakho aahjaoyahrao'ning Dimasani *Jonthai*. Jonthai saosi bisilai hahthani khihphi, raji khihphi Madai-haithi ni khusi dahng phudu boh hahthanining orahani subung ni Daikho. Yaohonha hahthani wardaohi, raji bahngdaohi Jonthai ni khusibo bahngdaokha.

Raji, hahthani, hahphaih gibin dohngma glaihkha. Jonthaibo bahngdaoma nangkha. Daikhobo Jonthai bahngdaobalai'ning bahngdaoma nang kha. Puila bubliha eboh Jonthairao'ning Raji naiso-nuhso jaba. Raji daohi-luhi phaibaha rajiraokhe lamah dihsoba. Hoja jahi rajikhe raokhiba. Yahonha subung yerdaobani Jonthai saojahng naiso phuya jakha. Odehbani raji khohngsikhe naisomani Jonthai'ning Khunang, Dilik berenkhe songba. Khunang Dilik rao Jonthaini garo mote rajini hamba hamya naisoba. Aar odeh jahngbo jayakho, yaohonha hahphaikhe raokhimani Raja songba eboh Jonthairao'ning. Madai-haithi (Dharmo), Jonthai aar Raja baa Gabara Dimasarao'ni dara blehp. Yaohon gedeh Jonthai aar Raja-raji'ni khusi beren yephaih laire, rohnlaire. Raja jabba-misih aahjaore. Rajini proja-mehlehg'ni dukhu-hadi, hamba-hamya, jaba-jaya baren'ni garaokhe naishohi dengre. Jonthai, Gorasali, Gora-mali, Hojairao Madaini, hubagarbani khusi berenkhe dahngghi dongre. Elaiba hajora niprang'ning esaba subung-jaddi ni ja-rihmin jajenbase. Dimasa rao nibo eboh hajora niprang ning ja-rihmin jajenbalai dongmaiiaodu.

Rehphi-phaih hi dehngyabani Dimasani Jonthai, Daikho, Raja jajenbani jihniha duha mussi basain-bohor (tarik) ni hisab giri. Dimasa ni Grao-Khani Grah '*Hajihng mailangi, hajihngmuthumhi*'khe naikhade daohi-luhi phaibani ja-rihmin, *Dilaobra-Sangibra'ha Melma-Melsa Khamtahaothao*'bani ja-rihmin berenkhe mithihphudu. Boh ja-rihmin berenha Jonthai rao, Dainyah raose lamah dihi rajiraokhe labubalai jadu. Daohi phaiba, luhi phaiba, hahthani hamdao, dithani hamdao nayahba khusi berenbo Jonthai-Dainyah rao ning dangbase.

Jarihmin-sgang (pre-historic) bublini ja-rihmin jihniha giri. Raja songjenba, raji khajenbani ja-rihmin'ni basain-bohor jihniha giri thih'hi saganhaning thibukha. Bahjang niprang daohi-luhi phaiba boh beren'ni ja-rihmin jing thilaphuya. Duhani Assam hahphaihaha (North East ha) phaihi braha raji khahmjenba bohnibo basain-bohor jihng dehngphuyakha. Thihkhabo graogibi je eboh Assam hahphaih'ha Dimasaraoning phaijenba. Odehbani'ning Ahomsarao Patkai hahjuh gaphlaih'hi phaiba jahng Assam hahphaih'ha Dimasaraokhening goron

jenba seh thihhi Ahom Buranji berenha dohng. Ahomsa 'D' khe 'T' thihre. Odehbani bunsu 'Dimasa' khe 'Timisa' thiba. Ahomsa raophaibani bubli berenha Dimarajiha hah-thikya, di-thikya jayakho. Odehbani Ahomrao Dimarajini hah-berenhaning raji khahi dohngjenba. Jabba-misi jamani garao giri. Namu-kurmu jamanibo puilaha hajora giri. Yaohon gedeh Ahomsarao jahng jabba-misi jakha, namu baigo kha, dainlai sulai jakha. Gathaisi dohngghi noh-sur noh-hari jaba hamyahi Ahomsarao jahng degaohlaima nangkha. Jabba-misini ja-rihmin, khaiba-birbani, raji khasaih bani, daikhao disaih bani ja-rihmin beren japhaikha. Odehbani Dimapurha raji khahi raja dohngba niprang Dimasani ja-rihmin'ni bumihn nuhjaokha.

Ahomsarao phaibani sganghala Dimasarao jadi masijahng dohnglaibani Gusu-gatharni grao giri. Saima-gajaimani gabahng grao giri. Dimapurha raji dohngbaha Ahomkhe garhibo Magahmsa jhang noh-hari, dang-hari dohngma glaihkha. Joyontia Raja Pnsaraokhe Joyontia raji niprang rikhonbabani yahonha Pnsarao (Karbi) Dima Raji ha khaisengma glaihkha. Bunsibo Dimasani noh-sur, nohhari jakha. Ohlai noh-hari donglaibani khilaihi Dimasarao Magamjik, Pnajik jahng noh jalaire. Elai noh jasenglaibala gusu-gathar ni grao sophaikha. Tharkhuma rukhumani graokhe baohlaihi Jonthairao serekhe tharjanang aar serekhe tharjaya bichar khilaihi tharkhuba-rukhubani dara slamma glaihba. Magahmsa-Magamjik khe Magam Daothar aar, Pnasa-Pnajik khe Pnadaothar thihhi tharkhumani dara Jonthairao slamba. Ohlai dara khilaiya thikhala Dimasarao malaini bisik khe noh jahi thanglamase. Bunsikhe Dimasani raji singha mathaohi dehngma nangdu. Boh niprang Jonthairao ni khusi habah bahngdaoba. Rajini dara-disakhebo gejobdaorima nangba. Lut put jama jayahba rajini darakhe Jonthairao se slamphinba.

Jabah-misih jalaihi Dimarajini hah-hari thahngdao phaidao jakha. Dimasarao givin hahthaniha khaiphlung-birplung jakha. Hahphai givin givinha dohngma nangkha. Raji khasaima nangkha. Raji givin, hahphaih givin jahi Daikhao givin, Jonthai givin jama nangkha. Ohlai jahi yaohon hah Daikho, Jonthai beren slamsengma glaihba. 1853

A.D. maithaiha Dembra hahphani Tularam– Nawai-Raja Gupgusaneh raji haigersobani bubliha Dimasaraoni khrihp hahphaih Daikho 12 ni bisinghah dohngtharre. Raja jahm kha, Rajibo gubrukha. Dembra, Dijowa, Hasao, Hawar hahphaih mabriha Dimasarao dohnglaima glaikha. Duhah Dimasani phantha hor thihkhabo Dimasani Daikho 12 aar Jonthai rao duha sosih dong kho. Daikho, Jonthai-Dainyah, hojai, huyah-garyah khrihp milihi Dimasani raji(somaj) khe naiso-nuhso jahi dehngdu. Eboh Daikho, Jonthai dongbanise dihni Dimasani raji thahngghi dohngba. Jekhali Daikho girinang, Jonthai jahmnang, okali Dimasani raji (somaj) gubru gsaih jamani khinthal raodaohinang.

Sganhaning rehpkha, Dima Rajiha Daikho 12 dohng thihi. Boh Daikho buthuni buhmu jakha– (1) *Alu Daikho*, (2) *Baiglai daikho*, (3) *Hamri Daikho*, (4) *Longmailam Daikho*, (5) *Manja Daikho*, (6) *Mungrang Daikho*, (7) *Misim Daikho*, (9) *Ronchandi Daikho*, (10) *Riao Daikho*, (11) *Walgong (Waibra) Daikho*, aar (12) *Wah Daikho*. Eboh Daikho 12 khe garhibo Dembra hahphaih ha ‘Porman’ Daikho dohngbani grao kahnadu. Thihkhabo duha boh Daikhoni musi khusi (Function) nuhya. Jonthairao ni grao mote manangha eboh Porman daikhoseh Pnasa-Pnajik khe ‘Pna Daothar’ thihi tharkhumani dara yaophajaoba thihi.

Arikidima ‘dihsini dih’hi, phaihsni phaihyahba’ nprang baigoyahba Dimasani Madairao– Sibrai, Duh-Raja, Naikhu Raja, Wah Raja, Gungyung-braiung aar Hamyadao basaoha rehpyahba Daiko 12 ha khahmre. Arikidimani dihsniba daodih gablahm nprang hahni Madai, hah ni Sgain, hamyagri-thaoyagri, sgoh beren baigore. Boh berenkhebo Dimasarao huma-garma, yaowaima nangdu. Eboh huba-garbabo sangsaibaha sangsai jaophabaniseh Dimasarao dahngyahi goya, dahngmainba.

Duha Daikho 12 ha Jonthai 12 dohng. Eboh Daikho 12, Jonthai 12 ni basaoha Gisiyah thihi Jonthai Grah saosi dohng. Gisiyah Daikho 12 ni asaba Jonthai gusu jakhade dithar khainhi tharmathar phinphudu. Jonthai gaddain songba habo Gisiyahni dithar nangdu. Daikhoni mih sengba, Muluk jahng mih sengba berenka Gisiyah jonthai dongma nangdu.

Muluk jahng mih senghi gerbaha, Daikhoha gerbaha Jonthairao niphrang saosi Phathri baigore. Phathribo Jonthai ni bisinghaning dohngphare. Eboh Phathri rajini, mulukni, hahthanini hamba-hamya thihlangbakhe garhibo saophainni graojmahbo thilangre. Eboh Daikho, Jonthai, Phathri, Gisiyah, Hojai, Barowa beren Dimarajini bosohng. Dimasa somajni rihmphonng. Bubli slaihba mote khrip subung-jadini dara-disa, dohngthai-jihthai, daohba-luhba, gainbaphinba, malaoba-miniba, khajathai beren khaisa khaisa slaiphalangre. Subung jadi masi thahngghi dohngma thihkhade elai slaihphalangma nangre. Dimapurha Raji khahi dohngba niphrang rajiraone nangbakhe naihi dara-disa slaihba thihi sganghaning rehpkha. Magam Daothar, Pnar Daothar tharba ni grao thih bu kha. Yaohon ha khelmasa khe tharkhumani "Khel-Dima" tharkhuba ni dara bo slamkha. Erahajihng grao masi baoba maidu je gdahha Raja dohngbaha Dimasarao jar sere jahng noh-sur, noh-hari dohngba boh beren khesening tharkhumani dara-disa slamba. Boh bubli berenha Dimasa ni rogongha Khristan/Thurusa giribani tharkhumani dara slamyanaibha.

Guphusa Dimaraji langlabani yaohonha Gupusani Christian Missionaryrao Dimasaraokhe Kristanha hahprima phasa naiba. Jonthairaoke phaihkhong phuyahi bunsu Dimasani hahthani niprang genehhi Magam raji, Lushai raji berenha bunsu ni Dharmokhe (Christian) phiyerre. Elai Jonthai dohngbanise Dimasarao dihni sohsi jarni dara-disa, garao lairidim berenkhe smaoyahi dehngphuba. Kristankhe tharkhumani grao giriba. Odehbani tharbani darabo nangyaba. Thurusarao jahngbo Dimasarao yaonhase goronhnaiba. Boh bubliha Dimarajiha rajirao dukhu-hadi jama nangba. Raja thik giri jaba. Ohlai jahi Raja jahmdi jahmdini bubliha Jonthairao musi dara slamprang phuyahi thaohba. Tharseng daomani bauhphuyaba. Odehbani khlahining Hawar rajiha saosi gni Turusa/hadisa jalang labani ja-rihmin janaiba.

Dimasani rajiha Daikho, Jonthai girihide musi japhuya thih'hi jihng duha mithikha. Daikho, Jonthai mananghabo dohngba, duhabo dohng aar danaghabo dohngma. Thikhabo grao masi, danangha jihni

Daikho, Jonthai hamdaonang bohkhe bauhlaima nangma janaihdu. Daikhoni Jonthairao, Dimasaraoni *Dara-Thong'gahphong* (Foundation) khe smaoma nangya. Elaiba grao buthukhe sainlaima-jolaim ni duha jihni Dimasaraoniha hahthani (Platform) giri. Odehbani erahaning khaisa rehpnang baoba. Duha rehpa riyahbajahng dophalaiya thihkhabo Daikho-Jonthai ni graola dohphabalai jajaodu. Eboh aahng baohlayahba graose. Rajirao ebohke nangjaoyalaphure.

(A) Alaidao pathri thih langba '*Egah Giri Khaiphainang, Grang Giri Birphainang*' thih khade '*Aahng phaiphin'nang*'. Dimasa rao (aahngkhe laha phahi) '*aahng phai phinnang*' thihbani Dimasani Madai aar Dima Raja bagri thihmbang bang khahi , sehng goda bainhi phai phihnbakhe jhonlaiba lai jadu. Alaidao pathride ohlai Madai, phai phihnbani graokhe thihyalai jadu. Egah giri khaibani , grang giri birbani bubli hade muluk ni dara-disa, Raji-raja givin jatharma, khrihp slaih tharma, Raji naisomanibo dara givin jama- ohlai thihbalai se jadu. Muluk ni dara slaibala gibi . Duha khrihp hahthaniha raja girikha. Bharat swadhin jahi , dara slaihba Dimasaraobo khaisa rohn pantha mainkha. Raji maiya khabo zila maikha. District council maikha . Duha Autonomous Council jakha. Ebohni yaonha aar bahngdaohibo jalaphure. Eboh District council/Autonomus council'ning duha jihni 'Raja Nohkho !' Ebokhe hamsisih khilaihi yaowaikhaning duha jihni manangha Raja dohngbaha bisilai hamhi dohngba bohtha hamdaohi raji janang. Alaidao pathride elai District Council/Autonomous council maima khese thihnaihba. Odehbani jihng duha eboh Autonomous Councilkhe aagdu lahazi sgangha Raja, Jonthai slamhi galangyahba dara-disakhe hamdaohi, duhani muluk jahng miligothai khilaihi slamsengma nangre. Dima Hasao zilani Autonomous Councilkhe'ning duha Dimasaraoni 'Raja-noh kho' baolaima nangre.

(B) Dimasarao duha Asimsa, Hadisa, Dimisa, Kulisa, Nepali, Bihari, Turusa, Khristan beren jahng noh-sur noh-hari dohng laima glaikha. Odehbani duhani Dimasa-Dimajik rao malaini jadi jahng no jasenglaidu. Noh-sihng noh-khong'ni thag giri jakha. Jadi doji jahng

jadi si jaba ni duha khrip jahng 'Khalai Hari' jilaima glaihkha.

Noh jasenglaiba niprangla tharkhuya baohkhabo tharkhu maidu. Asimsa-Asimjik khe tharkhukha. Hadisa, Nepali, Kuli berenkhe tharkhuhi 'Dimasa' slamkha. Turujik, Khristanjik raokhebo tharkhukha. Meyahraokhe serebani Sengphong'ha hahprikha. Masainjikraoni Jaddi (Julu) gibin rikha. Jaddini buhmu rikha. Jaddi songsenghi bahngdao rikha. Elai jaddi songsenghi bahngdao ribani duha Jaddi 42 niprang bisilai jahikha bohni hisab raji-rajaboh thiphunang niya. M nang'nilai sengphong gaddain bumu slamprang phuyahi malaini sengphongha sengphahaba nudu. Hainbai-dibai giri. Dimasani rajiha gabahya. Dara yaowai ya. Madai-haithini, sengphong'ni Madai berenkhe mithi hihmanede jainbi kho. Duhani eboh dara dangthai jahngde danang yaohonha khaisa lut-put jamani blahm dohngbalai jajaodu.

(C) Aahni hisabjhang, duha Daikho 12 ni Jonthai-Dainyah, Mujari, Khunang, gibin gibin Dimasani Hosom buthu, khraoh rao khrihp jahng hathani masiha bojohm jahi masi Convention khahmma nangre. Elai Convention khalaima thikhade 'nihng-aahng' Convention luhngghi janang niya. Dimasani Raja noh-kho'laiyah ba Dima Hasao Zilani Autonomous Council hoja jahi salai khade khusi jala phure. Eboh Convention ha somo belaiyahba grao bonoh mathaoma, boh berenkhe khaisa rehp'hanang. Eboh daogari (outline) sening.

- (i) Gdahala Jaddi-Sengphong songma thikhala 'Semdi-Khunang' khe lahahise khusi dangba. Eboh Semdi Khunang Registrar (Dobthor) ha rehpkhu khase Jaddi-Sengphong maiba. Duha jihng eboh Semdi-Khunang ni 'thug-go' (Office/Institute) khe dehngma nangnahng? Autonomous Council ha khirihp Dimasane Semdi-Khunang ni Cell / Office / Branch / Department masi khulikhala bedeh janang? Dimasaraoni Jaddi/Sengphong 42/40 ni basaoha bahngdao rikhala bedeh jare? 42/40 ni bising'haning sengphama thikhala somo dara jama nangma?

- (ii) Daikho 12 ha 'Daikho committee' slamkhala bedeh janang ? Jar sereni Daikhoha hap'phahi *tharkhuma* ni khusi sophaire orahani Daikho Committee puilaha bisar khilaihi Semdi-Khungang'ne haihhakhala hamdao nang ?
- (iii) Tharkhubani 'Dang-Dara' lai (Constitution/Bye-law) slamkhala dara geheb daonang ?

Eboh khusi buthu sainsi saingni jahng jari phunang niya. Aahng baohba motela puilaha Autonomous Council 'Core Committee' lai khilaihi Committee masi slamdahi khusi habah jenma nang re. Elai khlaikhade jihni Dimasaraoni Daikho, Jonthai beren khusi dangprang phudaonang baoh ladu.

Rjabdmbai

–Phanibhusan
Halflongbar, Diphu

Rjabdambai, eboh graothai gdainse. Sanskritjahng Sangeet thiyaba graothaikhe graodimajang bedehe thire khanaphreba gri. Rajabthai, damthai suthaini laishigra (Sangeet Shastra) ha dong– Geet = Rjabthai, Badya = Dammung, Nritya = Baithai. Eboh magtham graothaikhe (Word) lahi Sangeet graothai jaba. Rajabthai jahng khram dampakhala khnathaodaore, Odehe boni lugu sereba baipakhala aarbo jeegdaore. Eboh graokhe baohi jajaohi Sangeet thiyaba graothaikhe grao-dimajahng 'Rjabdmbai' thihi bumu denglaba. Rjabthai + Damthai + Baithai. Songthedaohi Rjab + dam + bai = Rjabdambai. Eboh 'rjabdambai' thaimin (grao-bthai) khening eboh rehpu hah yawaiphalangdu.

Rjabgrah :

Dimasa rjabdambaini graokhe jenbaha sgangthaoha Dimasa Rjab-Grahi graokhe jendama mangdu. Dimasa Mdai baoba bihbani birilikhe Rjabgrahi bojohmha laphaya thikhade jing Rjabgrakhening jinni radaothaoyaba rjabthai bojohm thima nangma. Bisuni rjabthai, dangbajibani rjabthai, gdani murithai, Deshruni, Johayani, Mjangdini, Hariphani rjabthai berenkhening jing Rjabgrah thibase.

Rjabgsrahkhe bebehe basao mithiphuma :

1. Murithaikhe garhi Dimasa rjabbaha kharam dampaba dara giri.

2. Rjabgrahde kharmin-jarmin, saohgongsini dukhu hadini grao, dangba jihaba, habasaoraolini mjangthai, samaj-rajini dara phangsa boh beren graothaikhe lahi khakhure.
3. Rjabthai Rjabgrahde habasaoha thanghi dongbaha doda khuda jahi khajuh niphrang baigolayaba reanlayaba graokhe berilijahng thiph laba jophlabase. Laihsiha rehpgong dihi khamhi rehpyaba rjabthai nia. Gtar habsaoraoliha donghi hajaiyababani Mdai sangsaiyaba bonphang samphang, dimuh dikhong, khimbar laining Rjabthaini sah'grah Rjabgrahbo gtarseh.
4. Rjabgrahni birili Dimasa Rjabdambaini yader, dimuhseh. Eboh birili classical formse dongba. Jini boh birili pattern mlaini jahng miliyalaise. Boh jar saojahng'ning mjanglaphudu. Brai Sivaraini khorosaoni prang Di-Gathar Ganga hajaihi habasaokhe gathar khlaiphubalai Rjabgrani'bo birili mjang jahng khirikhebo khajariphudu.
5. Rjabgrah rjabbaha khram damphaya thikhabo rjabbaha chanda, tal, man, matra odehe loyni hishab dengma nangdu. Bharatni classical 'Raag' rjabbaha rjabyahjang Tabla damyahbakhe hamsi baohi naikhade eboh graokhe mithiphudu. 'Raag' rjabjenbaha Tabla damyabakhe edeni dampflungbalai khnare. Thikhabo orahabo hishab dongbase. Dimasa rjabgrah rjabbahabo khram damphayakhabo bising bising loy. matra beren hisab denglama nangdu. Aar olai sere rjabphunang boni Rjabgrah rjabthaining khanathaonang.

Dimasa rjabgrah habasaoni khirib rjabgrahni bisingha khanathaoyaba masise. Eboh rjabthaini garang smaothai hamsining gbinse. Boh odebani khanathaobi odehe dubo dubi.

Dimasa rjabdambai hadaiyao khiribbo jini Rjabgrahni birili odehe grang smaothaikhe ringdakhade hamdao thaomuh. Jarkhe Dmasa ringkhudamsa thihi bsao mithijaoma thikhala jarni Rjabdambaini graokhe mithidakhala hamdao thaoyaba. Thikhabo dukhu nangmani grao jing Rjabgrani habahkhe blaodao blaodaose japhaidu. Ebo jini gede waimu khongsi.

Murithai :

Sganganing thikha murithaide Rjabgrahni -bojornishe. Murithaide baibakhe dopahi rjabthai. Baibaha damyaba rjabthai rjabthaikhening murithai thibase. Murijahng dambani murithai, murini rjabthai– Murithai.

Murithai hajaibakhe boni birili berenkhe guthu khlaihi baohi naikhade ebokhe rjabgrahni bojohmhaning dengphama nangdu. Thikhabo murithai songthe songthe jabakhe naihi, boni lugu khram damphabakhe naihi aar baibahasining murijahng suphinjahng dambakhe naikhade bokhe rjabgrahni bojohmha dengphaba jasoyalai jadu. Odebani murithaikhe Rjabgrahni nangyaba debsi thiba hamdaonanglai jadu.

Dimasani bisilai Rjsbgrah khnaba maidu boh buthuni birili masi jahng masi baosi nia, givin gbinse. Aar olai givin jabaning boni mjangthai khnathaothai. Rjabgrahni birili buthude jini phanthade masi masi 'Rag' seh. Eboh graokhe jing khaha dengma nangma. Bharatni classical music'ni mahdoh (6) Raag niprang bedehe jadi Ragini baigoba olaining jini Rajabgrahni birili niprang jing rjah rjah Raagini birili khaikhophudu. Mjangdijahng Gra-Simang'ni birilikhe khanakhade eboh graokhe jing haprhang maidu

Rjabjalai :

Dimasani jarni biriliejahng gdainkhe gibringhi khakhuyaba rjabthaikhe 'Rjabjalai' bumu dengjare. Kharao-grahbo jasoya aar Aansa Naga'bo nisohya. Odebani boh jalaiseh, olaibani bokhe Rjabjalai thihi bumu deng jare thihi aangde baoladu. Dimasani rajabdambai hadaiyarao saosih gini olai rjabthai khakhuyaba dong. Thikhabo jing boni bsaotha hamdaohi thudaohi baothaima slammani hajora dongkho.

Rjabjalai bedehe jama nangre :

1. Eboh jadi rjabthai Rjab Grah'lai nisoya. Thikhabo jadini identity odeh jarni peculiarity mathaophugothai jama nangma.
2. Rjabthaini graothai thudao hamdao odehe saih saih gdain

rjabthailai jama nangya. Rajbthaini graothai meaning (theme) jini Rjabgrahlai jadi jadi thikhala aarbo hamdaomase.

3. Ebo jadi rjabthaini birrili bangdaohining jini jarni birili jama nangma.
4. Khram-Muri beren prominent dammung (instrument) jama nangma odebani jini Tal graode Dimasa tal khening yawaima nangma. Khnathaomane gdain instrument masi magini yawailaphure thikhabo overlapping jayagothai jamaning nangmase.
5. Rjabjalai rajbbaha gibin jadi yawaiyaba Folk Instrument yawaima nangya. Olai yawaikhade jini jarni mithijaothai identity thaoyamase. Eboh graokhe aani jarni practical experience niprang thilaba.

Eboh jadi rajabthaikhe rjabmane rjabyah saosi jini garang smoathai odehe pronunciation stylekhebo silingdalakhade hamsining hamdaonang.

Kabi Guru Rabindranath Tagore hajaihi boni rjabthai 'Rabindrasangeet' odehe Kaji Najrul Islam hajaihi boni 'Najrulgeeti' Hadisaraoneh yaosandi rihi boh jadini rjabthaini hadamkhe gnanng khlaiba. Assamni Gono Shilpi Dr. Bhupen Hajarikani rjabthai berenkhe duha 'Bhupendra Sangeet' bumu denghi dang-gede dangthai dangyabakhe jing silingma nangre. Diniha nudu Hadisa-Hadijik saoshi Rabindra Sangeet ringyakhade bokhe Hadisa nialaise boni yawaidu. Jarni laihsi laihbra, damthai suthai berenkhe slamkhubaha boni olai saoh nangbakhe jing silingma nangre. Rjabjalaikhe slamkhuhi hamdaorihini jini Rjabdambaini hayamkhe janadaorimani saominde aangde bohase nulaba. Rajiraoni jurumah maikhade boh khusibo jahimase thihi aang khadelahadu.

Rjabgdain :

Rjabdambaini habaha rjabjalaini yahonha Rjabgdainni hathani. Thinang thikhala dinini Rjabgdainni musibo khorong barai girikha. Habasaoni dongbasi birili, tal, loy matra khirib orahah hathani

maiphukha. Ebokhe jasojaoya jadu. Bonsi thidu Rjabgdain'ni habah Rjabdambaini muluk'ha bumu ghang (popular) bedebseh. Ebokhe garhi Rjabdambaini habah sosohya thaodu. Odebani jarni desh ni hamba classical odeh boni dara mjangthai gma-gmu jadabe jini deshni khlahi gede waimuse. Hamsi ringyayaraoni yaoha glaikhala bola aarbo hamyadaomani grao dong.

Graothai jarni, rjabyah jarni, music composer jarni, hathani jarni jahibo jini rjathaiha jini thanini bahai mamangbo girikhala bokhela sumu jadi rjabthai thimakho olai saosi gini rjabdambaini hojarao thidu. Bharatni hoja gede Pandit Rabi Shankar, hoja gedema A.R. Rahman bonsini compositionha bohaseh jarni hathanini music'khe gibringba blaoyaba. Jing khnadu A.R. Rahmanni music, compositonha south Indiani jarni birilini bahai nalaibo dongphadu. Boning boni mjangthai blaithai aar man maibani blam.

Dimasa Rjabdambai hadaiyarao eboh graokhe guthu khlahi baohi boh habaha rimkhade jingbo sainside jini hamba rjabgdain khanab maiphumase khah dedu.

Grao- Dimani Graothai Birili (pronunciation) khe lahi Waimu :

Jing mithidu jini givin hahpaine graodimani graothai jothai birili baosi jablaiya. Olai graothaini pronunciation baoshi jayayaba jini hamsi bangbanide nia thikhabo boning jing kabita rehpaha, rjabthai khakhubaha gaso suso khlaidu Olaiyaba thaisi thaigini graothaikhe eraha rehphi rilahadu -1. Ningkhe - Nungkho - Noungkho, 2. Jing - Jung - Joung, 3. Thipsi - Thupsi, 4. Khim - Khum, 5. Thangdada - Thangnana, 6. Hajik - Haju.7. Busu - Bisu, 8. Jik -JooH, 9. Ling - Lung, 10. Rim - Rem,11. Birba - Burba, 12. Gibin - Gubun.

Dimasa Rjabdambai hadaiyarao, Rjabthai rabyarao bonsi jar jarni hahpaiha bedeh graothaini birili yawaidu olaining rehpaha odeh rjabba habo yawailadu. Thikhabo common pronouciation jakhala hamsining hamdaomu. Rjabthaiha malaini jadi laihsia yawaiyabakhening common Khlahi yawaibase. Dimasa Lairidim Mel ebokhe maiphaihi habah jenkha, bohah khribbo juruma nangremuh.

Jing jon bangyabani jini rjabthai rehpyarao, rehpha phaiba hadaiyarao graosi jahi common niyayaba pronunciation khe yawaiyahi masi jadikhening yawaiphure.

Rjabthaini Birili ribahah Jayamah

Mlaikhe follow khlayahi, mlai birili riabakhe jarni rjabthaiha birili riyahi gdain khlayi Rjabthaiha birili ribade hamsi laiyaba grao niya. Pronunciation birili khaisha ejahng ojahng jakhade graothai thaisini meaning gibin jalangphure. Odebdani gbangning mirikma nangdu

Rjabthaini graothai Rjabbahah Blama Nangre :

Rjabthaini graothaikhe khnayaraoone birilijahng thiabakhening rjabba thibaseh. Musical Instrumentjahng jew jahi khanayarao bthai khamao habyakhade bokhede rjabthai thiba jasoya. Odebani rjabbaha graothai blama nangre.

Rjabgdainhah yawaiyaba graothai beren majangma nangre :

Naga mathlani khaja minini, dukhuhadini ode aasabanise jala jini rjabgdain buthuha yawaiyaba graothai buthu khnathaoyaba jama nangre. Khrib graothaikhe rjabthaiha yawaiba josoya ode jahng rjabthaini mjangthai giridu. Olai jabanining All India Radio ha rjabthai recording khlaibani sgangha rjabthaikhe jaba jaya naisoma gjaimane dara dong. Cinema filmbo Board ni clearnence maiyasi release khlaiphuya.

Basaha thiyaba graokhe sainlaimane maithaijahng 2000 ha aang Haflongha Dimasa Rjabdambai hadaiyaraoni mel khongsi longbamuh. Thikhabo jbah - mishi jabani boh melha thilayaba grao buthukhe dinibo dangsophuya thaolaba. Eboh graokhe jing jenphinphure.

Baithai (Dance) :

Rjabdambaini grao thibaha 'baiba'ni graokhe jenyakhade shosoya jadu. North East Indiani bisingha Tribalraoni dongyabasi baithaiha nubalaide jing Dimasharaoni bithaining mjangdaothao

thibakhe jaya thihi baopuya. Sumuni thikhala :

1. Jini baithai gda gdani baithaise. Dini gdain khlahi slamyabania. Gibin gbin tribalraoni beren gdain khlahi slamlayaba baithaining bangdao.
2. Dimasa baithaini discipline gbin tribalraonitha bainining gbinse. Murithaiha dongbalai thikhala Brai Shivaraijahng Mamah Gamadise jini baithai luhthaikhe sangsairilaigba thidu.
3. Jini baithaini rjabthai mlainilai nia.
4. Jini baithaini 'tal' bo mlaijahng miliya.
5. Jini baithaiha yawaiyaba dammung beren jini jarnise. Hahng khaohi damyaba muri Bharat'haning sengbi. Jibu bairiyaraokhe olai dambade nure.
6. Jini baibaha yaphri surthai gbinse. Eboh jini baithaini peculiarity gbin jadiha nuphreya.
7. Baibaha yawaiyaba gainsari phinsari jini jarnise.
8. Dimasa baithaini rjabthai murithai birili khrib jini jarnise.
9. Jini baithaikhe nokha naisibo baiphudu.
10. Jini baithai jadi baangbi, gmangya.
11. Classical form'ni niyakhabo boni mjangthai discipline'ni khlahi folk dance ni bisingha jini baithaikhe classic baithai thijadu.

Dimaszas Rjabdambaini habahah Khram, Muri, Suphin odeh Ben

Kharam, Muri, Suphin odeh Ben eboh buthuning jini jarni dammung (Musical instrument). Thikhabo waimu nangmani grao jakha diniha jini rjabdambai hadaiyarao boh beren dammungskhe yawaiba blaophaikha. Baiba silingyaraode bangdao bangdao japhaidu, thikhabo khram muri damginyaraode giridao giridaose japhaikha. Baithai luthaini habaha eboh gede waimu khongsi jakha.

Rajiraoni Khasaomah Jurumah odehe Baosmai Bthai Nangre :

Aasaba khusihabo rejirao jurukhase jaba. Rjabdambaini habahabo rajini baothai odeh khrib jadi jurumah nangsongdu. Dinini eboh habaha damgyarao rjabyahrao, damyahrao, suyahraode

khiribbo jadini mayajangse hadaiba, baigoba. Rahng rih maidaomanede saosibo khaha baophuya. Sumuni thikhala jini jonkhe naikhala odehe jini jadini khrib habahabo jadaoba jayadaobakhe naithaikhala baithal luthaini habaha donghi makham khabaosi hamsi maijinangkhening baophuyah. Odebani jini Rjabdambai hadaiyarao dukhujahng thikhabo cassette, Video film beren khaikhohi lagai nangbaning darase. Thikhabo jadikhe wainsohi odeh jar jarbo khajabani dongphuyahi jini saohsi gini rjabdambai hadaiyarao olai Film, Audio, Video beren slambailadu. Bonsikhe khribbo blai balailai jurulaikhade hamsining hamnangmuh. Luguha asaba dimasa boma bopha, khraorao bonsini aansaraokhe jarni baithai luhthai, rjabthai berenkhe silingbaha khajamah rimatebo aang biladu. Jadaoyarao jadinikhede silingma nangdu, boh graobo jabi thikhabo jarni mah-grah saoni pha-grasaoni baithai-luhthai ringyakhade jing jarkhe Dimasa thihi basao mithijaoba lajimani graose. Odebani blaikhabo blaiyakhabo boh baithai luthai jinikhe silingbaha lajine nangya. Baiba luhba blaibade hajaibaha maipabuma mangdune thikhabo abcd mamahngde ringphudu khribbo.

Dimasa Rjabthai, Baithai Luhthaini Hadamhah Dangyarao :

Engrajee 1971 maithaiha Dimasa phoriansaraoni mel khongsi Hawarni Ganganagar nolaiha (hahpai) jaba. Boh melhase graodimajahng rjabgdain aang khnajeiba Hironmoy Barman'ni khurangha. Aang bohah class six ha phoridu. Olai graodima jahng rjabthai khnahi aang hamsining jajaolaba odehe aangbo olai rjabthai grao dimajahng khakhuhi rjabma thihi khaha baolaba. 1972 A.D. maithaihah Silcharha All India Radio Station khuliba. Boh stationhah aang rjabmani audition ribaha pass jahi grao Dimajahng recording khlaiba maiba. Aani olai rjabjenyaba rjabthai jakha 'Jng Dimasa Dimumahni Dimuhsa' thiyaba. Eboning aang khakhujenyaba dimasa rjabthai. Boni yahonha aang jadi jadi rjabthai grao'dimajahng khakhuphalangkha odeh dini sosibo khakhudukho. Boh 1972 niprang dini maithaijahng 40 thaoya langkha thikhabo Rjabthai rehpbani

habahah aang baobalailai khaha khajama maiyakho. Thikhabo rehp'phalagkhade jadao japhalangdu odehe jini graothai buthukhe mjangsishi yawaiphudu bokhede aang haprang mailakha. Aang aansaha khakhuyaba rjathai berenkhe duhabo naihi naihi jayayaba nukhade graothai givin yawaihi hamdaorimaneh saoh nangladu. Aang Rjabdambaini habahah saoh nangbahah Akashvani Silcharini jurumah bangbi. Silchar All India Radio ni Dimasa Programme hah rjabmaneh khlaihi blaiyasi blaiyasi rjabthai khakhubailare aar olai jahi jahi boh lamaha aangbo saoh nangdao nangdao japalangma nangkha odehe diniha boh habahkhe haigarnang baokhabo haigarphuya jahi thaokha. Olaining jini givin gibing Rjabdambai hadaiyarao Akashvani Silcharni jurumajahng'ning rajiha rjabyah thihi saoh mithijaoba. Olai rjabyarao Dimasa neh phanthade bangsalabimu. Aani berenni duhbo wainsohba maiyaraoni bumukhe erahah jenladu. Bonsi jakhade— Bhadra Sorongphang (Dambra gakha), Golapsing Barman (Dambra gakha), Hironmoy Barman (Dambra gakha), Joynocharan Bathari, Sharmita Bodoso, Shubhra Barman, Sairungdi Barman (Dambra gakha) , Malabika Barman Longmailai, Paritosh Barman, Jahor Bodo(Dambra gakha), Dhaneswar Bathari.

Akashvani Silcharkhe garhi Dima Hasao Autonomous Council'ni Cultural deptt., State Govt. ni Cultural Centre, Haflong, givin givin hahpaina NGO berenbo jini rjabthai, damthai suthaikhe cassette, film Video beren khaikhobaha juruhi jini eboh habahkhe hamdaoriphalangdu.

Hawar, Hasao, Debra, Dijuwani khirib hahpaihabo diniha jinii baithai luhthaike silingba saoh nangdaophaikha. Kharam muri damyah suhyah sengbani cassette damhi thikhabo diniha bailaidu. Ebokhe Rjabdambai habaha jini hamdaokhaning thima nangma janaidu.

Dimasa Ringkhudamsah Baithai Luhthai Hadaiyaraokhe Blaoneh Nangya :

Dimasa rajbdambai hadaihi dongyarao oded boh habahah

danghi dambra gayaraokhe jing blaone nangya. Bonsi jini samajni khusi dangyaraose. Rjabdambaini haaba jadisini gede nangyaba masi bedebseh. Eboh habahbo jini janama nangmase. Lairidim Melbo eboh habahah juruphudu.

Kabi Guru Rabindranath Tagore boni rjabthaini laihsi 'Geetanjalee' ni khlaihining Nobel prize maibase. Dimasani bisinghabo sereba bakhalibaha olai hathaniha sohiphunang niya thihi thiha jaya.

Jini dinini ode damrakhorni ringkhudamsarao'khe jing man rikhasa bokhe nuhi dekhushnag aansa jalairao eboh habaha saoh nangdaoma odeh khaha khajama maidaomah.

Yahonthaoha aang basao mithiyabasi dambra gayaro saosi'gini ringkhudamsaraoni bumukhe man lekha jahng wainsohi erahah jenladu-1) Dimasani charan kabi graode rjabhi rjabhi dobaiyaba Jamya thihi mungbaola maiyaba Hawarni Debicharan Barman,2) Bidyadhar Diphusa, Benhoja, Diphuni, Gedemanihah aang Dijuwani baithai luthai silingjenba, aani hoja (Guru) dongba, 3) Nakhedao Hasnu, Mooriah, Dhansiri, 4) Ashilo Nabensa, Mooriah, Dhansiri. 5. Karuna Phonglo, Mooriah, Dhansiri; Dijuwani Rjabthai damthai-suthaini aani Guru-gniba, 6) Golapsing Barman, Rjabyah, Hawarni, Classical Music'ha aani guide jabagnang 7) Hironmoy Barman, Rjabyah, Hawarni.8) Jahar Bodo, Rjabyah, Haflong'ni 9) Bandhuri Daolaguphu, Rjabgrah Rjabyah, Diphuni.

Luguha aang mithiyayaba gdani dinini dongyaraosi ringkhudamsa rjabdambai hadaiyaraone aani khajuhni manlekha riladu.

Grao-dimani Tone

–Deepak Barman

Guwahati

Graudimade Tibeto-Burman grao berenha glaidu. Tibeto-Burman grao berenha naithausiyaba grao masi jakhade, bo grao berenha dongyaba tone. Grao jobaha, grauthai berenkhe khanabaha, judaubalai jaba, bausilai jaba, niyakhade hidaubalai jaba, odehe, laudauba niyakhade shonthedaubalai jaba thikhade, bo grauha 'tone' dongba thihi thire. Magin, magtham syllable dongyaba grauthai masihaning jadi gibin gibin tone dongbakhe maidu. Odehe, grauthai masi thikhabo, boni tone jadi gibin gibin jakha thikhade, bo grauthaini khiminbo (meaning) jadi gibin jadu. Maithaigin sgangha, ang Professor Robbins Burlingni Language Resource Person (LRP) dongba hathaoha, ang boni khusikhe khaisa mithiba. Bo hathaoha, bo graudimani toneni basaoha khusi dangba. Graudimani baini grauthai berenha jaditham tone dongbakhe nubani, Robbins Burling jakhade graudimaha jaditham tone dongnaidu thihi bauba. Thikhabo, yakhon gedede gibin grauthai berenkhebo naidaukha, odehe bo grauthai berenhade jaditham tone maiyabokha, jadigin se maisiba. Jaditham tone dongyaba grauthai berenkhe daogariha naikha thikhala,

1. (i) bai [bâý] => broadcast
(ii) bai [báy] => dance
(iii) bai [baý?] => break
2. (i) dain [daýn] => moon

?

- ** (ii) (b)dain [daýn] => month
 (iii) dain [daýn?] => cut into pieces.
3. (i) di [dī] => water
 (ii) di [dī] => sweet
 (iii) di [dý?] => carry
4. (i) buju [bud'u] => grandfather
 (ii) buju [bud'ú] => tip of a tree
 (iii) buju [bud'u?] => packet containing something
5. (i) shao [s°YṢ̌] => rot
 ?
 (ii) shao [s°YṢ̌] => body
 (iii) shao [s°YṢ̌?] => lit fire, burn
6. (i) sheng [s°[K]] => sword
 ?
 (ii) sheng [s°[K]] => scanty
 (iii) sheng [s°[K?]] => put inside
7. (i) shu [s°Ṣ̌̄] => wash
 ?
 (ii) shu [s°Ṣ̣̌] => thorn
 (iii) shu [s°Ṣ̣̌?] => punch
8. (i) thao [t° YṢ̌̄] => tasty
 ?
 (ii) thao [t° YṢ̣̌] => oil
 (iii) thao [t° YṢ̣̌?] => to stop
9. (i) thu [t°Ṣ̌̄] => sleep
 ?
 (ii) thu [t°Ṣ̣̌] => deep
 (iii) thu [t°Ṣ̣̌?] => wear clothes like pant, shirt, etc.
- 10.(i) yao [¼YṢ̌̄] => Exclamation

?

(ii) yao [$\frac{1}{4}Y\check{S}$] => Noisy

(iii) yao [$\frac{1}{4}Y\check{S}?$] => fry agthamkhe hamshi naikha thikhade, jing nudu, phunudaogari berenni- (i)ha, grau joba hamshi bladu, grangkhe gepheriya, tone bausi jadu (Level Tone). Grauthai (ii)hade grang gepheridu, odehe, tone judaudu (Rising Tone). Odehe, grauthai (iii)hade, grangha jur glaidu, grang gepheridu, tone judauhi, odehe blasoyahi srap thaudu (Glottal Stop).

Duha daogariha naibonang jaditham grauthai giriyaabakhe. Ebo bakhiani daogari berenhade, glottal stop dongyaba grauthai giri. Odebani, grauthai maginsening dongsiba.

1. (i) bere [berç] => germinate, blast
 (ii) bere [beré] => bee, steemed
 *(iii) bere [bere?] => Nil
2. (i) dong [dôK] => be verb
 (ii) dong [dóK] => being playful, being naughty
 *(iii) dong [doK?] => Nil
3. (i) gain [gaýn̄] => wear
 ?
 ** (ii) (m)gain [mYgaýn̄] => cold
 (iii) gain [gaýn̄?] => Nil
4. (i) gang [gâK] => thirst
 (ii) gang [gáK] => challenge in anger
 *(ii) gang [gaK?] => Nil
5. (i) jao [d'YŃ̄] => clean rice, etc., by removing rice husk,
 ? small grains and dust, using
 (ii) jao [d'YŃ̄] => dig, stab a tray-like bamboo.
 *(iii) jao [d'YŃ̄?] => Nil
6. (i) kham [ê°âm] => burn
 (ii) kham [ê°ám] => sit

- * (iii) kham [ê°am?] => Nil
7. (i) mai [mâý] => rice grain
 (ii) mai [máý] => find
 * (iii) mai [maý?] => Nil
8. (i) samai [samâý] => calculation of future events
 (ii) samai [samáý] => search
 * (iii) samai [samaý?] => Nil
9. (i) shong [s°ôK] => stand
 (ii) shong [s°üK] => cook
 * (iii) shong [s°oK?] => Nil
10. (i) shing [s°íK] => shave
 (ii) shing [s°íK] => ask
 * (iii) shing [s°ýK?] => Nil

Elaining grauthai masijangning jadigin, jaditham, olai, grauthai jayabakhe linguisticsni grau jang 'homonym' thihi thire. Elai homonym jayaba grauthai berenkhe joba hade (pronunciation) bausi jahidu. Thikhabo, bokhe rebbaha (spelling) khaisa jadigibin bo jalaphure. Basaoni daogari berenba bracketni bishingha rebyaba jakhade bo grauthaikhe IPA symbol yawaihi rebba. Odehe, bo grauthai berenkhe rebbaha, diacritic markerkhe yawaiba: ' - ' = level tone, ' ´ ' = rising tone, ' ? ' = glottal stop. Basaoni daogariha, masi ' * ' = ebo grauthai giri; magin ' ** ' = bound morpheme.

Bithilim

–Hiralal Thaosen
Komorakata, Hojai

Lamayung'khe himphalang kha, nalai himyaba nohlaini lama thikhabo khaisa judao hidao, khasedaobalai maiphanagkha. Nohbo jainkhalai jajaokha.

Bokhorobo ser gidingbalai jajaodu. Muthaigni jahngbo lamakhe hamsi nuyakha.

Horhade elaining lamayungbo khasebaire janaidu. Gungsudao slinghoja kha bisingha baobailakha.

Nohni khorongkhe khuruhi hakhilijujha borjonglai songhi nobrajik Thairubar'khe jirik khaokha - 'Hoi! Khana kha na khanaya ? Oisor! Brai Sibrai khamaola gabaning risikhalao eboh masaingiknila, khurika gudung jahng khamaokhe jaodungma nagmathi ?'

Gungsudao'ni thamsi nokhosao gurjili'batha phradaohi khanaiju ha sohikha. Bithilim dungkha. Bakhaha banglama phaibalai maokha.

Bithilim ! subung'ni bithilim gamang thaosisi, ebohni khlaihining subung khrib hahng-ganagthane thangdaoba.

Bithilim dungkhaning Gungsudao'ni bakhaha jalang'ni baryungmah phaibalai jadi rokom grao phaire.

Gungsudao bsa-bisikkhe subung salamnang baohibo, subung salam phuyakha. Jengkholong mander saomi nuyaba saomi jahining thaoakha.

Subung jahi subung jamani mlai jahng lekha-jokha khalaijaone, thangdaoneh thikhala laihsikke hamsining hadaima nangdu.

Laihsi ! Laihsini grao baigokhaning saohkhimi gosong jare. Sao-ega gilimdi jahng jehm jehm jare.

Laihrehpdibo muthaiham naihayakha Gungsudaoni basa-bisik'khe. Aalang tham jangbo majiba class (Matric) khe mamahng gakhula phuyakha Dangsrdao. Bisik Hamringdi'bo jadaoya hojani bogung a khusab ! Olise baophanagre Gungsudao master.

Songkhoha makham jibiliha Gungsdao thire- 'Baba ! Dangsrdao, laihsi hamsi khah muh rihi phuri. Laihsi ringkhaning jayakho, ringbani basaotha ringma nagdu. IAS, IPS, ACS maiphuyakha thikade dini dakana jarjahng jadi masinibo man thaoya.'

Buphani graokhe khanahi Dangsrdao IAS, IPS, ACS jiyaba na lingyaba baoba maiyakha'bo laihsini grao thibani thikha- 'Olai laihsi ringmani thikhala bithilim bithilim ham'ma nagmase.'

Bithilim ! Bithilim hamthing baohining smaha gakhubalai boron gisim jahng mdai huriba, nagu-nagja bokhorokhe jiridu, sadhuni pharang jabise, longthaisa gainridu, thikhabo nisi buthuni bithilim nadini hamyaba ? Olai thihi Gungsudao judi belasi grik khalihi lingkha.

Dangsri laihsikhe khah rihinig phurire thikhabo nadi jababo phuriyabakhe khaha mathaophuya.

'Ju linghining bithilimkhe gomar khalaikha'- Dangsrdao bupha he thikha.

'Angse ju lingba ningla lingyathi, nini bithilimla nadini hamyaba ?'

'Ang ju lingyabani nadi jakha, nisini ju lingyaba bithilim, khathai-baothai khese maiba. Ningbo ajuni ju lingyaba bithilim khese maiba, bithilim gomarkhese maiba angla, ani bithilim bedde ham'ma ?'

Hamringdibo bringkha- 'Gadani pharang ju lingkhalibuyaba Dimasaraoni bithilimla bedde ham'ma, ju'ning bithilim'khe gikhor tharkha'.

"Amai ! Hamring ning mussi khebo mithiya. Jula jini dara phara haning lingma nagdu. Ju'ning Dimasaraoni mithijaomani bagari, Dimasa jahi ju lingya thikhala bola Dimasaning niya thi, ju lingkhase sao, kha, khu siringre, jula muli sethi, jula mlaini jadiraose lingdao, nogoi mlainila bokho-ro-bithilim hambilao, nisibuth laihsi phuribaha khakhening riya'-

Gungsudao thikha.

Jo-nang-joya baohi Thairubar bring kha— 'Dangsri, Hamring'bo jayaba gibi graokhening thibaseh'.

Thairubar bash-bisik jahng grao'thaisi jabani Gungsudao thikha— 'Eboh beren khirib nini sibringthai niyakhala eboh bsah-bisik brani phrang grao ringma', songkhoha jeu jalaikha.

Gungsudao ni nohlai hayungha, bumu gibide Bangsri Maramsa. Ansahah bogung suba raobanise buju Banglapha Gungsudao bumu dengba.

Nohlaini M.E. School ha slinghoja. Nohlaini ansarao khe subung salamkhunang baohi laihsi sibringhi sibringhi khanai dobong barlai jakha thikhabo bonsini baophang ha nohlaini ansarao saohsibo subung japhuba giri.

Gungsudao calss hah laihsi phoriribahah hamsining kha rilare. Dimasarao'ni bsa-bisikni khathai hamya-miyaobi, Dimasaraoni bithilimla nadi jakha— baogmangbailare. 'Genius is nothing but infinit capacity of taking pains'— geniusla musibo niya thidu thikhala nadini Ramanujan, Newton, Socrates lai yaba Genius Subung Dimasaraoniha hajaiyaba ?! Eboh bithilimning Dimasaraonide hamya naibaseh.

Gungsudao bakhaliba baogamangre, phurikhoyung hah phuribaha Gungsudao maib— "Tribal jadiraola jarni rehpm (script) khaikhola phuyabani darajangning dini sosi yahon thaolaba.

Kharmin ganag, jarmin gang jadi Dimasarao nadini rehpm khaikhoh phuyakha ? Elai jathai jahng Dimasarao habsoh hah budu glao dongphunang niya. Bithilim'hah hamsi baothaikhabo blahm maiya. Olaiyaba graokhe baothai baothai himphalangi bakhali phurikhoha sohigahakha Gungsuda tharmailayakha. Dini boni kha class'ha khanya, bedeh thikhala nolaiha phuriansarao'ni melmah khongsi khamdu. Melmahah thangma nangma. Phurikhoni phrang Melmah jathani hah sohikha. Mel hah phaiyarao ringyarao grikyarao, bithilim ganarao joyaba nangyaba graokhe khanarikha.

Melhoja jobani saganghah rajiraoni saghanghah jomani phoriansa saohsi songkhukha. Dangsri khe jomani songkhuba nuhi

Gungsudao ni muthaigni bathain'hah sohikha. Banglamah phaibalai samokhukha, midimhi khabising hah Barai Sibrai'khe bihkha 'Oisore ! Mdaidaograh, nadi jamakho !'

'Dimasaraoni bithlim hambu hamya niya, thikhabo juning jini bithilimkhe jitharkha, hajaikhabo ju, dambra gakhabo ju, jukhukha maikhu'khabo ju.... khrib habo ju nagdu. Eboh ju jini Dimasaraoni bithilimkhe gadani pharang jini dini sosi bo jidukho. Thikhala Dimasaraoni bithilim hamhidonmathi ? Rajirao nisibutho baolai, ju jingke bisilai yahon drurikha, jing jukhe samajni pharang garma nangma. Aar brain culture khalaima nangma. Bithiim bedehe hamdao riphunang bao, rajirao.'

Gungsudao basah Danasridaoni graokhe khanama mujungyakha. Nohabo elai grao khening, baijihabo buh graokhening jodu. Eboh ansanila bithilimseh hamyakha janaidu ! Doctor nihah langmaima nangkhathi.

Gadani pharang, raja saohni pharang Samajhah ju lingphabudu, boh dara disakhe dangkhalaiphure ! Ju dangkhalaikha thikhala Dimasaraola nadi jahng Mdai humakho, bedehe Bisu jima, maimuh tharma, jukhuma-maikhuma ! Thamsi phulung baigohi melni pharang baigobulakha.

Sainbo jorokha. Gungsudaoni bithilim bokhoro thamsi jahng dungkha. Nohah sining sohinangkho, Dangsriddao ! Nini bophalamkhe dini khaikhonang.

Lama himba pharamani Gisimdaoni nohah belasi grik khalaihi pharahi himkha.

Khorong bringba khanahi Gungsudaokhe thamaiyahi nohni sisa gahng-gahng jahi singkha. Sisa singba khanahi Thairubar baiji naihon phaikha.

Gungsudao thamsi jahng Meseb bogung Subalai phoh ! phoh ! khalaihi bogungkhe sukha.

Khariminsah :

Bonjuh Odehe Mander

–Bonashree Barman (Singyung)
Cachar

Manang gdahah 'Bonjuh' odehe 'Mander' thihi bihanndao gini dongba. Bunsu hamsinung majangbi. Gdah bubliha 'Shogoh' thihi hamyayaba Raikhoslai dongbakho. Boh subungkhe jire, buni khalaihi Rajini subung hamsisi dongba jaya, khaiding birding se donglaiba. Rajihah subungbo olai jasi yerphuya. Sogoh bahai lahi lahi subung'ni noh-noh'ha thanghi samai jihire. Odebani khribbo khinlailare. Ejahng ojahng thimhi-thimhi dongre thikhabo goya bojahng jijaobaning bangdaore.

Sogohni bokhrohabo bogrong dongkho, muthai deba gede gede guphuh guphuh, bahathai buthu jakhade galau-galau, guphuh guphu h. Boh subungkhe jimane bahai lahi sinung dongba. Gedemah gujumah Sogo khe serenung khingyanang. Aasaba bosthukhe gujuh gujuh nuhare nuhare thikhabo yaojahngnung phalaohi lahare. Rajini subung Sogoh phaikhanung khaiphulungthar're.

'Daurili' jahng 'Dausandi' thihi khaiphulung gni boh rajiha Rajani dau gauyasah dongba. Bunsu sainsibakhali Bonju jahng Mander bihandao gnike Sogoh jinang baohi khindada guju khldaihi noh danghi Sogho maisoya gothai galanghi, hagraha dau gaomaneh baigolangkha. Noh'bo noh gakhumanenung siri lauba thimi-thimi. Bo sirikhe noh bisingha denglangkha. Bunsu thilangkha– 'jung phaikhanung eboh siri'khe haihadou.' Danangla bunsu bihanndao gnila

jonkhabo phaijaoya, jonkhabo phaijaoya jahi samadi jakhabo baolaikha, jonsonglaiphuyakha, mudriseh thangkha bihandao gni'jahngnung.

Ejahng jakhade Sogoh subung jima baigobukha odede raji'hah gahsengphaihi noh masihah haphikha. Boh nohah khuthaithai grahjuh masi donglaba, khaimabo khailaphuya rakhabani. Sogola boh grahjukhe rimhi jimaseh jakhathi, grahjula jar golamanehi khalaihi thikha— ' Hai !Jonkhoh jonkhoh aani grao thaisi khanakhoge. Aangla rahbo rahkha, phuhbo phukha dini dong dakna gri. Odebani ning jahng jijaohi thihlakhabo aanide mussi thangyaka phaiya. Thikhabo nini khlaihiseh thima baoba , aani behgrengla rahkha bahainbo johkha, aangkhe jiji ningla thaojaonangneh ?! Thaosisi jima thikhade hougo— orahah thang'go. Boh noh gujuhyabaha majangsisi mathla magin dong. Bunsikhe jibaseh thaoma.' Sogohbo grahjuhni graokhe lonsengkha, boh baikha gibibo gihinungthi, grahjuni bahainlah sum thamakho,mathlaraokhe jibanung thaomaseh. Odede baohi boh noh gujuh gedehe riklailangkha.

Ejahng gedehe bihandaognihah radaoyabala mudrijahng gundijahng Daurili-Dausandi khe phaikha baohi baklahah yahkhlem (siri) haikhlaihakha. Danangla naibala Sogoh seh gakhuphaikha. Sogoh jakhade Bonjuh jang Mander'khe nuhimajangseh majangjaosengkha; jikhmaphuyakha, jukhumase thikhathi. Bubila khinba raolangbajahng gibirlai jakha. Nadi khalaimakho baophrang phuyakha. Bahandao Manderde khaisa girikdao. Boh buddi jahng khusi dangkha. Sogohsmaba bedeba khlaihi phuslaihi khirkhi rogonghah langhi khirkhi gedehe nesengkhalaiikhane. Olai noh gujuhyaba nising hahah glaihibahah longthaihah bokhro nanghi thel thel jasih grubdada Sogoh lugu lugunung thikhaha.

Daurili - Dausandi hapthasi yahonhah sophaikha odede Bonjuh jahng Manderkhe juruhi yahkhlem (siri) rihamane thikha. Ejahng bihandao gni jakhade bringraolaiya— Sogoh phaiphinbokha baohi. Bubu thikha— eboh Sogola thining thiyakhogo, duhah gakhuphaikhade jungkhe jimaseh. Bohanung bahandao khirkhi

gedehe naihonhakha. Danangla Daurili jahng Dausandi khe nuhahi ' Agmi ! Agmi ! ' thihi jurulakha. Thikhabo gajainbani bonsi khanahaya. Bonjuh jahng Mander khede Sogohnung jikha baohi grahi grahi thanglailakha.

Sogoh'ni behgrengkhe baklahah guphu khilaihi nukhabani bonsi Sogoh jinaikha nbaohi lonsenglaiba. Sogohnung jihi danghi behgreng buthukhe galangbaseh thihi bonsi thilailakha. Odeh raji gibinhah thanglailanang thihi thanglailakha. Ejahng Bonju jahng Manderbo noh basau nising aakhaibukha.

Mairugothai phrahi Daurili Dausandini yahon yahon thangphalangka bihandaogni jahng. Bahandao jabukha juru-phalangdu- Agmi... Agmi! Hoi Agmi ! .. thihi. Bubi thikha- jungkhela thikha bauhise nini Agmithula thanglanaibathi, bedebo jamakho duhala ! Jungkhe thanghi dong thihi thamaiyanaidu. Mander thikha- thangnang jungbo mairuyakhabo. Olai thilaihi gnijahng thangphalai langkha.

Yahon yahon thanghi thaghi gbangning gajain sohikha, Thikhabo bonsikhe mairudaoya. Jainaobo jaindaoyda. Ddanangde baini yahonhah dorga Daurili jahng Dausandikhe nuba maiyalanglakha. Thikhabo bonsini yagainkhede nuhba maidu. Boh yagain songhinung bihandaognibo thangphalilangkha. Thang thangdaola sainblisehse japhaikha, Bubila khinba raolangbajahng; khah khinsenglahi dinide jamma jakhadou sining baobailasiba.

Khinyaba hathaniha hor maohre thibalai hor seh jabokha. Boh bubliha mihsih'seh goronbokha. Bubila bahandaoni yaokhe jeb rimkha. Bohah bahandao bubikhe thihare, khinba sumuni ? 'Jeh ebolah Agmissethi?' Danangde mihsibo olai khanahi mukhang phinhi sehr gidingshi thanglakha. Ode bihandaog ni khaisalai yaphri surlaibukha. Danangla gedemah galaomah jibuseh sorbukha thiduthi. Gisimmah, garang gisim jibukhe nuhi bubila khinbukhathi. Thikhanung bahandao thihaborene- jeh ebola Agmi thusethi. Thibajahngnung jibubo yahon phinhi thanglarene.

Olainung thanghi thanghi sohibukha hathani gathaisihah sohibokha. Danangla wai'seh bulung bulung goronbokha. Baisoma

bedebo, wai'janhgnung khamthainang— bubi thikha bahandao khe. Bubu olai thibajahngnung bahandao jarni bigmi'ni bumu thihabore, waibo siri jahi gamalanglare. Wai'khe banar laibade di'seh dam dam maibukha. Bede phar jama di'la hamsinung thunangthi ! Bubila khinlabure, thikhanung bahandao thihare – jeh, ebo-bo agmithuseh jama, Naidou eboh Di thunang niya, jini yaskhusinung jama thihi yega gasengbade di'bo rainthar langlakha. Danangla Daurili jahng Dausandi seh baigophaikha. Bunsu baigohi thikha— 'Jingke nisi bihandao gni dadopha, niside gusuh jakha, Sogoh nisikhe gidinkha, nisi nohha thangphinla jini yahon darusi!'

Mander grahi grahi thikha— 'Sogoh khede jung buddi jahng sathikha, jing gnide gusu niya, jung sere jahng dongmakho ! Jungke gusu dakhlai.' Bubi jahng bahandao gralailakha. Ejahng Daurili jahng Dausandi bunsikhe Sogoh gidinkha thihi gusu saikha.

Grah grahi mudi jahng gundi jahng Bonjula jarkhe sathailama jakha. Bohanung Daurili jahng Dausandi thika— Bonjuh jahng Mander'khe, 'Jingla nisikhe jukhuphuyakha, nisikhela jingla gusu saikha, nisini noh ha 'Sogoh' hapba. Dei thikhade dini phrang jung khaiphulung gini 'Dau' jalang lanang, odehe nisi bihandao gnibo dini nsing 'Buphang' jalanglama, odehe nisini bubarkhe jing khaiphlung gni bubar barthor thikhanung maithaiphrong phaihi jijen phaiyadusi musih jadi gubun dau thiyaba bubar hah banang niya.'

Dinibo Bonjuh-phang jahng Manderphang'ni bubarkhe subung gusu thihi saidu.

Daurili-Dausandi phaogun badainha Bonjuh-Mander phangha bubarni bidikhe jobjen phaidama, thikhaseh gubun daobuthu jiba jenma.

Habsaohah Hajaihih

–Paritosh Barman (Orchid)
Mariani

Habsaoha hajaihih, ang dini –
Subung'ni saogari maihihbo –
Subung'ni khusikhe dang' thangphuya,
Subunglai bhauthai bhauphuya
Subung-gibi subung japhuya.

Habsaoni mjangdao bublihah–
subungni mel-bjom khambaha–
Subung'ni lekha mainya jahih
subung-mah subung-ni bjom niprang
Thauladu degaohih bijinghah.

Habsaoni mjangdao melmah-hah–
Subunglai dongphuya mjanghih;
Subunglai gibi-yaphri sringhih–
Tangphya mulukni lambrahah–
Yahonseh thauladu sgangmahah
Mulukni melmah mjanghah–
Subungni khamthani khamphlaihah–
Subunglai baukhade khamsmaim
Subunglai baugbi bausmimahah
Nangbase subunglai bauphuma.
Mulukmahni melmah melsahah
Subungni saulekha maimakhe
Subung'ni jo-lekha mainmahah
Subung-gbi subungbo jama nangbaseh
Subung-gbini yaphrikhe ruh'nangbaseh.

Thangba Lamahah

–Makhanlal Haflongbar
Diphu

Thanghi dong thanghining dong,
Mu-nini dongba thide sohigniyabahah,
Danaiphin yahonhah, yaosi yaodahah ;
Naiba mudisai gebengnang
Ejang orjanghah.
Oh ! Sengyah, ning rehpyah, ning Riphasgao ;
Nainuba mu-ha ning sohithani, bokhesining bao.
Hajikmah ning, kenehi damao,
Dikhongmah ning gasoha dathao.
Phaiphinnang jarimin, baigonang kharimin,
Maiphinnang Halai, Khasaibm jaolili,
Dimabong Halai, Dilihobam nohlal,
Bol nini Dehmaluh, buddihah ning Sambhudhan,
Raobahah Lunglabdao, Haludao, Rangadao !
Thaiphin giri ninihah, sohiyasih orahah,
Nuhikhaseh gibbikhe thaiphin ning maima.
Mahur Diyung Kolongmah,
Desruni hahngslikmah Kopilidi dergungha ;
Da-khabai k-nahi grah'simahng garaba !
Thanghi dong yaphri sur,
Ma-ganthi mainang bao,
Ha-gnthi mainang bao.

Birili-jahng thairili rehp'phalang laihsepsah,
Galangkhade tharmainang,
Halodaoni hahngslikmah, b-seh thaokh baraha.
Lamah nini jainbikho yahon phinhi danikho,
Mih-doh garbathi nuhanang,
Julao niya Dlao bao,
Lamahdebra danuhah so-sohima ning bao,
Dalaobra Sangibra nukhathi Arikhidimah.

Oh Amai

Janmejoy Longmailai,
Dangoriyabori Hojai

Oh Amai ningnong hajairiba habasao nuriba
Ningnong mahoni graokhe habasaoha sibringba
Ning sibringyaba mahoni grao khrib ringtharkha
Ningnong ebu habsaoni muluk'khe mithirikha.

Oh Amoi ningla dini raphaikha khanai guphu japhaikha.
Nini rag'ni birili khurang giriphaikha.
Ningla ejang ujang thangma baokhab thang phuyakha
Ningkhe dini bubili yaga-yao khakrobhi dengkha.

Oh Amai dini nini khurang dang khelai phaikha
Dini nini habai dibai dara-disa haigar-phaikha
Dini nini dukhukhe baoma maiphai yakha.
Ning khajahng sibringyaba mahoni graokhe snangyakha.

Oh Amai ningde dini mudiru gungdiru jaladu.
Khurang blahi thiphuya thikhabo jadi jadi jaladu.
Brai Sibarai Mang-Gamadikho khajahng bilahadu
Khabudi rithong baoma rithong mahoni grao habasasha thathong.

Dainjiginini Bumu

– Banashree Barman (Seongyung)
Cachar

Baisagi badiain bophang blai slaima,
Yasulaisah blai ridim'ma.
Jethhi badain phaima
Nokhasao-hadi gurum'ma.
Aasari-Srao phaima
Khukhila'ni khurung khnama.
Thaiju, thaiphulung'bo minma.
Khalamphu sersaima,
Badaojahng Aasari badain phaima.
Gadi-sainjora basain phaima
Aagung badain jabuma,
Mai-di, rakhulaima,
Hahkhlijuhah thekhlah-mikhri barma.
Phus-Makh badainni Bisu-jithor phaima,
Phaygun - Badain jabuma,
Daurili - dausandi phaima,
Bonjuh - Mander phangha baphaima.
Jaithri Badain phaima,
Badainbo jamjoraha sophaima.

Bharat Thirtha

(Rabindranath Tagore ni eboh Thairilikhe
grao-dima jahng thaislaiba **Biswajyoti Barman**)

Hoi khah ani, smaokhudi kherehi dini punya thirthahah
Eboh Bharatni subung gedeyungni sagor dirgunghah.
Erah songhi yao gongni phlaohi khilimdu Marsi-Mdaikhe,
Khawar khathai jahng khajayung khajahi bisong bidu bokhe.

Khamboira khamhi eboh hajuhyungmah,
Dibu jophuluh dihi eboh haphlaiyungmah,
Phirthimah gatharkhe nalai naila erahah
Eboh Bharatni subung gedeyung-ni sagor dirgunghah.

Mithiya saosibo longjaohi srejahngbo subung bisini dilam
Phrayung phrahi brah nising daobuhi sohmu dihah sorseng gmakha.
Erahah Aryo, erahah Anaryo, erahah Drabir Chin–
Shok-Hun-Dol Phathan Mughol saokhongsihah milismai milikha.
Sainjroh-hah dini khurakha dergamah, orah nising khribbo labudu
yaosandimah
Yaophanang khonkhunang, smainang smairinang, thangphin
thangphinglao–
Eboh Bharatni subung gedeyungni sagor dirgungglao.

Jabbahyung bahih dehrjab rjahih hohgibbir hohlaihi
Himphlahih hajengkhongmah gaphlaihi hajikyungmah phaiba
srerao daohi
Anining bisinghah dongbase khrib bosu, saosibo niya niya gajain-
Anining bithirenhah, dongbaseh bthaihah bonining birili rijing.
Hoi Binyungmah (Muriyungmah), bring, bring, bring regejaohi
gajain dongyarao dubo
Khorongkhe rusihnang- phainang bosibo songkhon
songsmainang erahah
Eboh Bharatni subung gedeyung-ni sagor dirgunghah.

Eraha sainsih thaojora grisih gedeh omkar-thaiyung
Kha-tantrahah montra burung jahng nanglaiba jabbahyung.
Tapasya-bol jahng wai hur-hah ahuti rihi (khamkhribrihih) gbangkhe
Bibhed blaokha (Saikhao jamkha), msahkhukha khahmahyung
masikhe.
Boh sadhanani boh aradhanani yoggo-bokhoni khuru dong
derga-
Khribbo nangma khasmama khroh gongglaihih erahah
Eboh Bharatni subung gedeyungni sagor dirgunghah.

Boh hom-waihurhah khamkhribdu dini naihah dukhuni waislai-bithi-
Nangma bokhe saoima, mormohah khamrima, bhaigyohah boh
rehpdongbasethi.
Eboh dukhu-bah bahdi khah ani, khnadi masini (saosihni) lungthai-
Laji-khainji khrib dethar dethardei, apaman gajain
thangtharthingdei.
Soisohphuya sathaih jamsah jamhi hajai phainang bisih gedeyung
hahng-
Hor-nokha-naidu, Mamah smaodu gedemah nothipyunghah

Eboh Bharatni subung gedeyungni sagor dirgunghah.

Phaidi Aryo, phai Anarjo, Hindu Thuruksah

Phai phai dini ning Engrej, phai phai Khristhansah.

Phai Bamin, khathar jahih yao rim khribni

Phaidi hoi Patit, jamsoh jamthing apaman dongbasini.

Mamahni abhisekhah phai phai phrahi, mugduh-gaham
dongkhoti phlungyahi

Khribni-dophathai-jahng-gathar-jayaba noh-thirthoyunghah

Dini Bharatni subung gedeyungni sagor dirgunghah.

Yader

—Jatiram Bodo
Hojai

Yader masi jingde
Jingde bedep gabang.
Halali hah bonphang grah
Jingde blaih baosih
Niya jingde borgong;
Jingde bakhrao gnang.
Mukhumu japhuya thougha ragairiya
Glaibajahng gumun balai
Sawgar gamaphuya.
Dini Halalihah bonphang grahni
Gili balai baosih
Majangphindu phrahphangsari
Dehphaihi juhphaihi jadou gakhranglili
Jandou beseng sainkhlm rima
Melmah khamkhali.
Slaiphinang gumun balai bangbasih bedep jahng
Phangsining yader masining baolaihi
Balai bedep degaoyahih
Mithijaonang yader masi thihi.
Naislema jing hurimakhe
Khasaoya jing yungraimakhe
Hadaiya jing khasaomakhe
Yawaiya jing naislemakhe,
Sainkhlm rima baonsahneh jing,
Buthup rima daohsahneh
Habsaohah jing phunuma ham-yader bagarikhe.



KHURANG

Published by : Gopal Bhargov Thaosen
General Secretary, Dimasa Sahitya Sabha